

.1915

## ՀԵՏԱՂԱՐՁ ՀԱՅԱՑՔ

.1918—1921



*Դրատարակիչ՝ ՀԱՅԱՍՏԱՆԻ  
ՀԱՆՐԱՊԵՏԱԿԱՆ  
ԿՈՒՍԱԿՑՈՒԹՅՈՒՆ*

Երեւան 2002 թ.

## ԲՈՎԱՆԴԱԿՈՒԹՅՈՒՆ

|  |    |
|--|----|
| 1915. ՎԵՐԱԳԻԱՀԱՏՈՒՄՆԵՐ   | 3  |
| ԻՆՉՈ՞Ւ ՊԱՏԱՐԵՑ ՑԵՂԱՍՊԱՍՈՒԹՅՈՒՆԸ<br>ԵՎ ԿԲԱՆԱՉՎԻ՞ ԱՐԴՅՈՒ ԱՅՆ     | 7  |
| ԱԶԳԱՅԻՆ ՎՐԵԺԸ ԵՎ ՑԵՂԱՍՊԱՍՆԵՐԻ ՊԱՏԻԺԸ<br>ԱՆԺԱՄԱՑԵԼԻ ԵՆ          | 14 |
| 1918 - 1921. ՀԵՏԱՂԱՐՁ ՀԱՅԱՑՔ                                   | 21 |
| ՀԱՅԱՍՏԱՆԻ ՀԱՆՐԱՊԵՏՈՒԹԻՒՆԸ ԵՒ ԱԽՈՐ ՏԵՂԸ ՀԱՅՈՑ<br>ՊԱՏՄՈՒԹԵԱՆ ՄԵԶ | 31 |

## 1915. ՎԵՐԱԳՆԱՀԱՏՈՒՄՆԵՐ

Յավակնություն չունենալով պատմական համակողմանի վերլուծության, ինչպես եւ ուշացած մարդարեությունների՝ հպանցիկ անդրադառնանք դարասկզբի մեր ողբերգությանը՝ «1915»-ին, եւ նրա հետ կապված իրադարձություններին, հատկապես, որ այսօր էլ լսում ենք ավանդական արդարացումները՝ իսկ ի՞նչ կարող էինք անել. մեզ խարեցին, դավաճանեցին...

Դեռ 1879 թ.-ին, Ռաֆֆին՝ գաղափարախոս-գրողը, ազգային այն երեւելիներին, որոնք նանկանտորեն հավատակից Եվրոպաներից ու Ռուսիաներից էին ակնկալուն Արեւելյան խնդրի բարենպաստ վերջը, ինչպես նաև նրանց, որ քարոզում էին անշարժություն եւ հնազանդություն, գգուշացնում էր. «Արեւելյան խնդրից միշտ կա ու կմնա, եւ տաճկաստանցի հայը պետք է նախապատրաստվի օգուտ քաղել հարմար դեպքից, երբ մյուս անգամ կհուզվի այն: Իսկ եթե նա միշտ անպատրաստ մնա<sup>9</sup>: Այն ժամանակ դժբախտ Յայաստանը, այդ Եվրոպայի եւ Ասիայի պատմական կամուրջը, ազգերի անցուդարձի ներքո կտրորվի եւ կոչնչանա...»:

Ցավոք, հայությունը մնաց անպատրաստ ու անկազմակերպ, եւ արդյունքում՝ Յայրենիքի մեծ մասի կորուստ, 1,5 մլն. կրավորական զոհեր...

19-րդ դարի վերջի Յայ ազատամարտը (այն ժամանակվա եզրաբանությամբ՝ թուրքահայ հեղափոխությունը) նախապատրաստված չէր գաղափարաբանորեն ու կազմակերպորեն, եւ արեւմտահայությունը հոգերանորեն պատրաստ չէր կրվելու: Եթե մինչ այդ, ներքին՝ դավանաբանական գգվատոցում «վարժված» հայոց հոգեւոր այրերը, իրենց աղերսագրերով, «Թղթե շերեփիք» ձեռքներին, արդարություն էին մուրում Եվրոպական մայրաքաղաքների կառավարական նախասենյակներուն (Երվանդ Օսյանը մեզ դիպուկ բնորոշեց՝ «նախասենյակի ազգ»), եւ մեր թշվառ վիճակի ներկայացմանը՝ փորձում նրանց գութը հայցել, ապա արեւմտահայ նոր Ազատամարտի դեկավարները՝ հիմնականում արեւելահայեր, հայության իրական հնարավորություններին անտեղյակ, ոգեւորված Եվրոպական ժողովուրդների ազատագրական կրիվներով, հաճախ էլ միջազգայնականության տեսնով վարակված, այբուբեն չիմացող մեր ժողովորդին ընկերվարություն էին քարոզում եւ հնչակ-դաշնակ կուսակցականություն խաղում: Արեւմտահայ ազատամարտն անխուսափելի էր, անհրաժեշտություն՝ գոյության պայքարի եւ տարրական ինքնահարգանքի թելադրումով պարտադրված, բայց ճիշտ չէին ընտրված պայքարի

միջոցներն ու գենքերը, հստակ չեր նպատակը: Մի նպատակ, որ հետապնդում էր Օսմանյան «հայրենիքում» հայերի ու թուրքերի ազատություն, նրանց համերաշխ դրացիություն, ի սկզբանե դատապարտված էր անհաջողության, քանզի գոյության կռվի տրամաբանությունը պահանջում էր, որ այդ հողի վրա կամ բնիկ հայերն ապրեն, կամ՝ եկվոր թուրքերը: Թուրքերը լավ էին հասկացել այս եւ գործեցին հայերին տեղահանելու ու բնաջնջելու հաստատակամությամբ: Իսկ մենք որդեգրեցինք հայդուկային անջատ կրիվները (այն ժամանակ էլ կային լուսավոր անհատներ, որոնք համընդհանուր ապստամբության նախապատրաստության կոչ էին անում, եւ դրանց շարքում հատկապես պետք է իշել Յրայրին), սուլթանականության դեմ պայքարը, անհատ թուրքերի ահաբեկումները: Բայց ցավոք, երբեք թուրք ազգի:

Մեզ չսրափեցրեց նույնիսկ 1895-96թթ.-ի 300 հազար հայության կոտորածը: Ո՞ւմ մեղադրենք, երբ այս անգամ էլ չհասկացամք, թե ով է թուրքը:

Ուստական առաջին հեղափոխության պարտությունից հետո, սուլթանի դեմ մաքառող հայ հեղափոխականները, ինչ-ինչ պարտավորություններից մղված, սկսեցին պայքարել նաեւ ցարի դեմ: Արեւմտահայաստանում պայքարը լուրջ հիմքերի վրա չդրած այն ծավալեցինք նաեւ Կովկասում. սուլթանի դեմ կրվել չկարողանալով՝ ցարին էլ մարտահրավեր նետեցինք: Այս գործելակերպի դեմ դուրս եկած միհրանականները հաջողություն չունեցան՝ որակվելով իբրեւ անջատական-պառակտիչներ եւ ցարիզմի գործակալներ:

Ո՞ւմ մեղադրենք, երբ հայության քաղաքական դեկավարությունը, 1908-ի Սահմանադրության օրերին, ինքնապահպաննան ամենատարրական բնազդը կորցրած, զինարափում էր հայդուկային խմբերը. դեկավարություն, որ համանարդկային ցնորդներով տարված, կամ միամտորեն խարված, վերագգային օրյակներում տեղ էր գրադեցնում երիտթուրքերի կողքին եւ տիեզերական եղբայրություն տենչում, որ չանսալով իր բնագդին, «ուղեղը սրտում տեղափորած», Գր. Օտյանից մինչեւ Ակնունի ու Զարդարյան, ոգեւորված, օսմանցիություն էր քարոզում եւ թուրքերի քաղաքակրթնան սին հույսը փայփայում. դեկավարություն, որ հայերին ազգովին բնաջնջելու՝ թուրքերի վճռակամությանը պատասխանում էր մարդասիրական «ջենտլմենականությամբ» եւ քավարարվում անհատների ու վարչակարգի դեմ պայքարով... Այդպիսի դեկավարություն ունեցող ժողովուրդը ինքն էր մեղավոր եւ, որպես մեղքի արդյունք՝ պիտի կոտորվեր: Մի ժողովուրդ, որ չնայած իր լավագույն զավակների հորդորներին ու զգուշացումներին, համառորեն չգինվեց ու չնախապատրաստեց վճռական կռվի, չեր կարող խուսափել մորթվելուց:

Մինչդեռ թուրքերը, որոնք հայ-թուրք բարեկամության խաղը (ինչ օսմանցիությունը) դիտում էին որպես քողարկված հանգրվան

իրենց համաթուրանական նպատակների համար (իսկ հայ գործիչները, հավանաբար, դրա անվճառ լինելու հավաստիացումներն ստանում էին որմնադրական օթյակների ղեկավարներից), գիտեին, որ իրենց կյանքի համար անհրաժեշտ է հայության մահը:

Այս համոզումով գործեցին թուրքերը եւ հաջողությամբ իրականացրին ազգակերտումի գործը: Չմոռացան, անշուշտ, առաջին հերթին վերացնել այն հայ «Եղբայրներին», որոնց հետ մինչ այդ սուլթանին տապալելու ձեռնարկն էին ծրագրել «Օսմանյան Սեծ Արևելք» օթյակում, եւ որոնք, հավանաբար, ինչ-որ բան գիտեին: Իսկ Զոհրապի պես միամիտը, որ 1909-ի Յամիդյան հեղաշրջման օրերին իր բնակարանում թաքցրեց Խալիլին, իրեն ձերբակալող ոստիկաններին թող տարակուսանքով հարցներ՝ արոյո՞ք իր «Եղբայր» երիտրուրք պարագլուխները տեսյակ են...

Ո՞ւմ մեղադրենք, որ դասեր չառանք նաեւ Ալանայի ջարդերից. երեւի ուրախացանք, որ մի քանի սեխագլուխի կախեցին...

Պայրեց Առաջին աշխարհամարտը, որի փորձությանը չդիմացանք, քանզի չինք նախապատրաստվել: Ազգովին համախնքվելու եւ ինքնապաշտպանություն կազմակերպելու անընդունակ գտնվեցինք, որով՝ արհավիրքին դիմակայելու անկարող եղանք: Դաշնակցության 1914թ.-ի Կարինի ժողովը բավարարվեց միայն «օրինապահության» որոշումով՝ գրեթե բրացնելով ինքնապահպանման մեր թուլացած բնագոր: Յնչակյանները, նաեւ իրենց անշնորհքությամբ, ձախողեցին 1913-ին Կոնստանցայի ժողովում ծրագրած նախահարձակ գործողությունը, որի արդյունքում՝ միայն 20 հնչակյանների հերոսական մահը բավարար չեղավ: Իսկ Յայկական լեգենդը եւ կամավորական գնդերը, իրենց հերոսապատումով հանդերձ, ըստ եւրյան, գործիք դարձան օտար կառավարությունների ձեռքին...

Արդարորեն՝ ջարդից չխուսափեցին նաեւ փրկագնին ապավինու հայանում մեծահարուստները, որոնցից շատերը, ի դեպ, «Իթթիհատ»-ի անդամ էին եւ նյութապես էականորեն նպաստել էին այդ կուսակցության վերելքին, փոխարենը՝ գրոշներ զլանալով Յայ հեղափոխության գործին:

Եվ 1915-ին եղավ այն, ինչ այդպիսի դեպքերում լինում է... Դարուեն, բայց եւ ճշճարտորեն է ասված. «Զո՞ւրկ է մի ժողովուրդ ինքնապաշտպանության ընդունակությունից՝ նշանակում է նա զուրկ է ամեն առաքինությունից, զուրկ գոյության բարոյական իրավունքից» (Գ. Նժդեհ):

Յայությունը դաժանորեն պարտվեց եւ, որ կրկնակի աններելի է, պարտվեց իր հողի վրա, պարտվեց ոչ հերոսաբար, այլ՝ կրավորաբար: Կրավորական զոհերի այն ստվար քանակը, որ տվեց մեր ժողովուրդը 1915-ին, եթե նրա գոնե փոքր մասը նահատակվեր մարտադաշտերում, հայությունն ազատագրված կլիներ:

Չնայած մի քանի հերոսամարտերի (որոնք, վերջին հաշվով հայության պատիվը փրկեցին՝ Յայրենիքի կորսույան հաշվին), 1915-ը հիմնականում սպանող էր: Անշուշտ, հիանալ եւ հպարտանալ կարելի է Ուրֆայի ոյուցազնամարտով, բայց եւ չես կարող չանաչել՝ ինանալով, թե ինչպես են մի քանի գինված ասկյարներ հազարավոր հայերի թալանել ու կոտորել: Ոչխարին մորթելուց՝ գոնե կդիմադրեր... Չես կարող չնախատել հոգեւոր մեր դաստիարակիչներին, երբ գիտենում ես, որ հեզարար մարագ քշված եւ կրակի տրված հայ բազմությունը, աղոթող տերտերի փեշերից բռնած, աղերսում էր, որ իրենց էլ երկինք տանի:

Տեղին է հիշել կիլիկիահայերի հոգեւոր առաջնորդ Սահակ Բ. Խապայան կաթողիկոսի սեւ գործը, որը, հատուկ կոնդակով, տեղի հայերին «կատարյալ հնազանդության եւ օրինապահության» կոչ արեց, որով եւ՝ նրանց մեծ մասին դատապարտեց բռնազարդի եւ տանջանահության:

Կան միամիտներ (այն ժամանակ էլ կային), որոնք պնդում են, թե չեզոքություն պահելու եւ Օսմանյան պետության հանդեպ օրինապահ լինելու դեպքում, կխուսափեինք ջարդից\*... Լուրջ չէ՝ թուրքական լծի տակ հարյուրամյակներով տառապող ժողովրդից չեզոքություն պահանջելը. հայությունը հոգեբանորեն չէր կարող անտարբեր մնալ եւ ըմբռուսության փորձ չանել: Իսկ թուրքերը մեր չեզոքության համար երախտապարտ պիտի չլինեին, քանզի կոտորում էին, որ իրենք ապրեն եւ հիմար չեն, որ պատերազմի արիթը բաց բռնմեին:

Մեծ եղեռնից փրկվածները խոստովանում էին, որ հայերս չենք ճանաչել թուրքերին, թեև հարյուրամյակներ շարունակ ապրել ենք նրանց հետ: Սովետական ժամանակաշրջանը, ինչպես եւ 1988-ի շարժման սկզբնական տարիները վկայում են, որ մենք Դեր-Չորից հետո էլ չճանաչեցինք թուրքերին:

**Տա Աստված՝ հետայսու լավ ճանաչենք... Եվ ո՛չ միայն նրանց:**

\* Վերջին տարիներին մեր մամուլում երեւացին գրություններ, թե դարասկզբի «հեթանոսական շարժումն» էր (նկատի է առնվում Վարուժանի, Սիրունու, Շանրի, Զարդարյանի եւ այլոց հեթանոսամետ տրամադրությունները) պատճառը, որ չհանդուրժեց Աստված ու պատժեց մեզ... Ոչ, Ցեղի աստվածներն էին խռովել մեզանից, քանզի նրանց գրույթով չսնուցեցինք մեր թուլությունը, եւ օտար աստվածները պատժեցին մեր տկարությունը...

***Մուշեղ Լալայան***

## ԻՆՉՈ՞Ւ ՊԱՏԱՐԵՑ ՑԵՂԱՍՊԱՆՈՒԹՅՈՒՆԸ ԵՎ ԿԲԱՆԱԶՎԻ՞ ԱՐԴՅՈՒՔ ԱՅՆ

*Պատմությունը օր մը մեզ ամենքս ալ պիտի դատէ  
եւ ամենուս ալ թերությանց ու հատկությանց  
վրա իր անաշառ վճիռը պիտի արծակե:*

*Արշակ Չոպանյան*

Յնարավո՞ր էր արդյոք խուսափել 1915-ի արհավիրքից, չկորցնել Ազգի ու Յայրենիքի զգալի մասը: Այս հարցը պարբերաբար արձարժվել, սակայն այսօր էլ չի կորցրել իր արդիականությունը: Պատասխանները եղել են բազմազան այս կամ այն կուսակցության դեմ ուղղված մեղադրանքներից մինչեւ կրավորական դիրքորոշման որդեգրման անհրաժեշտության մատնանշում: Կրավորական դիրքորոշումը՝ որպես ազգամիջան խնդիրների լուծման բանալի առաջարկումները, իրենց տեսակետոր հիմնավորում են նրանով, որ ազգային-ազատագրական պայքարները, ինչ-ինչ նպատակներով հրահրում են օտարները՝ սեփական խնդիրների լուծման համար: Անշուշտ, ցանկալի է խուսափել օտարների միջանտությունից, բայց, այնուամենայնիվ պետք է նշել, որ երբեք հնարավոր չի լինում այն լիովին բացառել, քանի որ ազատագրական պայքարի վերջին գինված փուլի համար ամենապատեհ ժամանակը հզոր պետությունների աշխարհաքաղաքական շահերի բախման ու նոր աշխարհակարգի հաստատման շրջանն է:

19-րդ դարի երկրորդ կեսը Եվրոպան նշանավորեց տնտեսության, գիտության եւ մշակույթի աննախաղեա վերելքով: Դա ունեցավ իր երկակի ազդեցությունը հայության կյանքի հետագա ընթացքի վրա: Յայ երիտասարդության համար զգալի հնարավորություններ էին ստեղծվում՝ կրթություն ստանալու, նոր գաղափարներ առաջարկելու, Ազգը ստեղծված ծանր կացությունից դուրս բերելու համար: Եվրոպայում կրթություն ստացող հայ երիտասարդությունն այնտեղ զգում էր նաև արագորեն զորացող ազգայնականության շունչը: Պատահական չէին փառավոր անցյալի ու հերոսների ոգեկոչումները, որոնք ավելի մեծ ընդգրկում ստացան հետագայում: Թվում էր, թե հայությունը հաստատ քայլերով գնում է դեպի ազատություն, որովհետեւ ոգու արթնացումը ուղեկցվում էր հայ քաղաքական նորքի ձեւավորմամբ: Սակայն, ինչպես ցույց տվեց դեպքերի հետագա զարգացումը, ընդամենը մի քանի տասնամյակ էր մեզ տրված, որոնք օգտագործվեցին ապարդյուն:

Միաժամանակ, Եվրոպական հզոր տերությունների համար ան-

հանդուրժելի էր դառնում Օսմանյան կայսրության տիրապետող դերը առեւտրատնտեսական մայրուղիների խաչմերուկում եւ Ռուսաստանի առաջխաղացումը Օսմանյան կայսրության թե՝ արեւելքում եւ թե՝ արեւմուտքում: Պետահական չեր, որ չափազանց կարծ կյանք ունեցավ 1878-ի Սան Ստեֆանոյի պայմանագիրը, որը հաստատագրում էր Ռուսաստանի հաջողությունները: Նույն տարում Բեռլինում հրավիրվեց միջազգային վեհաժողով, որի դաշնագրի 61-րդ հոդվածը, նվիրված հայկական հարցին, դարձավ Սան Ստեֆանոյի պայմանագրի 16-րդ հոդվածի անգլիական խմբագրումը՝ զգալիորեն վատացնելով Արեւմտյան Հայաստանի վիճակը: Այն Ռուսաստանին պարտավորեցնում էր վերադարձնել գրավված Ալաշկերտի հովիտն ու Բայազետը: Ավելին, Բեռլինում, որտեղ որոշվում էր Օսմանյան կայսրության տիրապետության տակ գտնվող ժողովուրդների բախտը, հայկական պատվիրակությանը չլսեցին իսկ: Եվ չնայած պատվիրակության ղեկավար Խորիմյան Հայրիկը միանգանայն իրավացիորեն նշում էր, որ նման հավաքներին պետք է գնալ պատերազմներում թրծված երկաթե շերեփով, սակայն դեռ երկար պիտի շարունակվեին սին հույսերով հայկական պատվիրակությունների այցերը դարի հզորներին:

Բեռլինի վեհաժողովը դրեց Օսմանյան կայսրության քայլայնան սկիզբը, եւ պարզ էր, որ այն նաեւ ազդանշան եղավ քուրք իշխանություններին՝ կայսրության հետագա գոյության նախադրյալները ստեղծելու համար: Բնական է, որ դրա ամենամեծ խոչընդոտը Արեւմտյան Հայաստանն էր՝ այնտեղ ապրող հայության գերակշիռ թվաքանակով: Աչքի առաջ ունենալով բալկանյան ժողովուրդների ազատագրական պայքարը եւ քաջ գիտակցելով, որ հայությունը, եթե ոչ այսօր, ապա վաղն անպայման ոտքի է կանգնելու՝ սուլթանական Թուրքիայի կառավարողները թրքության գոյության ապահովությունը տեսան հայ ազգի չգոյության մեջ եւ հղացան ու մշակեցին նրա ֆիզիկական ոչնչացման ծրագիր, որի իրագործումը միայն պատեհ առիթի ու ժամանակի հարց էր:

Դժբախտաբար, հայ քաղաքական միտքը չունեցավ իրատեսության ու սրափության անհրաժեշտ պաշար: Բեռլինում անգլիական դիվանագիտության հաղթանակը՝ ռուսական նկատմամբ, նրան Ռուսաստանից մղեց Անգլիայի գիրկը: Եվ այստեղ ու այնտեղ ծայր առան ապստամբություններ, որոնք միայն խաղաքարտ էին ծառայում Եվրոպական տերությունների ձեռքին: Իհարկե, խորին հարգանքի են արժանի այն հերոսները, որոնք գենքը ձեռքին իրենց տունն ու Հայրենիքն էին պաշտպանում տասնապատիկ թվային գերակշռություն ունեցող թշնամուց եւ հաստատում էին հայ ժողովրդի՝ իր ազատության համար պայքարելու ձգտումն ու ներուժը: Սակայն, ակնհայտ է, որ այդ ապստամբություններն ի սկզբան դատապարտված էին:

Դժբախտաբար, բացակայում էր ամբողջ Երկիրն ընդգրկող ընդհանուր ղեկավարությունն ու համախմբվածությունը, զինված պայքարի

մանրակրկիտ նախապատրաստումը: Դրա ամենացայտուն ապացույցն է Սասունի 1894 թ. ապստամբությունը: Իհարկե, ասվածը չի բացառում թշնամու հարձակման ժամանակ զինված դիմադրությունը, ինչպիսին, օրինակ, Զեյթունի 1895 թ. հերոսական պաշտպանություն էր, սակայն միասնականության բացակայությունը, ծեւավորվող կուսակցությունների միջեւ արդեն գոյություն ունեցող հակասությունները բացառում էին այնպիսի հաղթանակների հնարավորությունը, որոնք թույլ են տալիս հանդես գալ որպես բանակցող ու թելադրող, այլ ոչ օտարի ողորմածությանն ապավիճող կողմ:

Զարմանալի է, որ հարցի լուծման այն արատավոր ճանապարհը, որը իիմված է միայն ցուցերի ու «քաղաքակիրթ աշխարհի» ուշադրությունն հրավիրող այլ գործողությունների վրա (դրա «պսակը» դարասկգրին եղավ «Բանկ Օստոնանի» գրավումը), այդպես էլ չփոխվեց:

Միշենո ավարտվում էր 19-րդ դարը: Եվրոպական երկրները տեսդագին նախապատրաստվում էին աշխարհի նոր վերաբաժանմանը, իսկ Ռուսաստանում հեղափոխությունն օրակարգի հարց էր դարձել: Թուրքիան նույնպես պատրաստվում էր փոփոխությունների: Զեւավորվում էր այն քաղաքական շրջանակը, որը փոխելու էր երկրի սուլթանական դեմքը: Իսկ հայ քաղաքական գործիչները, տարված Եվրոպայում ու Ռուսաստանում վշջող հեղափոխական հովերով, մի դեպքում, Պոլսում սուլթանի տապալմանն էին մասնակցում, մյուս դեպքում՝ Թիֆլիսում, Բաքվում ու Պետերբուրգում՝ ցարի: Սեփական ծրագրի ու ազգային գաղափարախոսության բացակայությունը հայ քաղաքական գործիչներին ու կուսակցություններին, Եվրոպական ու ռուսաստանյան հիասթափություններից հետո, դաշնակիցների որոնման ճանապարհին՝ մնեց դեպի «նոր» թուրքերը:

Եվ իգուր էր դեռ 1878-ին Ռաֆֆին գորում. «Մեզանում կան մի տեսակ կարճատեսներ, դժբախտաբար դրանց թիվը մեծ է, որոնք նտածում են, թե այժմյան բարբարոսությունները, հարստահարությունները մի օր կվերջանան, երբ թուրքը կքաղաքակրթվի, այն ժամանակ, ասում են, հայը քաղաքացու հավասար իրավունք եւ ազատ կյանք կվայելե:

Այդ ցնորդ է:

Թուրքը այսօր անկիրթ բարբարոս է, բայց քաղաքակրթվելուց հետո կդառնա կրթյալ ավագակ եւ այն ժամանակ ավելի Վտանգավոր կդառնա... Ով որ ուրանում է պատմությունը, առաջ ինքն է կնքում իր դատապարտության դատակնիքը»:

Ո՞վ էր լսողը:

Դաշնակցական պատվիրակությունը հրավիրվում էր Փարիզում (1907թ.) «օսմանցի ազատականների» համագումարին, որը կազմակերպել էին «Երիտրուրքերը»: Դաշնական հարցի նկատմամբ այնտեղ արտահայտված եւ հետագայում դույզն իսկ չփոխված «Երիտրուրքերի» դիրքորոշումն էլ դաշնակցականներին ետ չպահեց նրանց հետ 1908թ. գործակ-

ցելուց: Եվ հատուցումը շատ չուշացավ: Թավշյա հեղափոխությամբ իշխանության եկած «Երիտթուրքերը» երկրում հաստատեցին «ազատական» ռեժիմ, իրապարակեցին սահմանադրություն ու... Պոլսի հայ քաղաքական գործիչների դեմքին սահեց արքեցումի ժայիթը՝ Կիլիկիայում սկսվեցին ջարդերը:

Վատանվում էր թանկարժեք ժամանակը, որը բերում էր միայն նոր հուսախարություններ, նոր կորուստներ, պարզեւում նոր հերոսներ եւ գլխապտույտ արագությամբ մոտեցնում արհավիրքը:

Մինչդեռ, Թուրքիայի արեւմտյան ու հարավային սահմաններում նորից բռնկվեցին պատերազմները: Նախ, Խտալիան ծնկի բերեց Թուրքիային (1911-1912 թթ.), ինչը նոր թափ հաղորդեց բալկանյան ժողովուրդների ազգային-ազատագրական շարժմանը (1912-1913թթ.), որի տրամաբանական ավարտը եղավ որոշ երկրների անկախացումը: Ոգեվորվեց նաև հայությունը: Սակայն ժամանակն անդառնալիորեն կորսված էր:

Եվ ահա թուրքը վերջապես ստացավ պատեհ առիթն ու բաղձալի պահը: Սկսվեց առաջին համաշխարհայինը, որտեղ պատերազմող կողմերից յուրաքանչյուրն իրեն ազատ էր գգում նպատակին հասնելու համար ցանկացած միջոց կիրառելիս, քանի որ հատուցում պահանջող չէր լինելու: Իրականանում էր թուրքի իննիարյուրամյա երազանքը: Արեւմտյան Յայատանը մաքրվում էր հայությունից: Եվ դա այն ժամանակ, երբ թվում էր, թե եւս մեկ-երկու տասնամյակ ու թուրքական տարրը համաշխարհային թատերաբեմից կքաշվի մի անկյուն՝ այլեւս իր համեստ գոյությունը քարշ տալու:

Ժամանակի հայ քաղաքական գործիչների ու կուսակցությունների խղճին ծանրացավ Ազգի ու Յայենիքի գգալի հատվածների կորուստը: Ժողովուրդն անզլուի էր ու անտեր: Իհարկե, կային անհատներ (Յրայր Դժոխք, Նիկոլ Դուման եւ այլք), որոնք ժամանակին տեսնում էին փրկության ճանապարհն ու մատնանշում այն: Սակայն նրանք, ինչպես նաև այս ու անտեղ կազմակերպված ինքնապաշտպանական հերոսական կրիվներն ու հայդուկային խմբերի հաջողությունները, որ միայն առանձին անհատների ռազմական տաղանդի ու անսահման հայրենասիրության արդյունք էին, չկարողացան փոխել դեպքերի ընթացքը:

Զարիհուրելի է ու պատկերացումից դուրս, որ մեկուկես միլիոն հայ զոհվեց եւ հնարավոր չեղավ գոնե պաշտպանվել ու գոյատեւել հայրենի տարածքներում: Միլիոնանոց ժողովուրդը կարող էր հարյուր հազարանոց բանակ կազմել ու դիմակայել թեկուզ իրեն տասնյակ անգամներ գերազանցող թուրքական բանակին: Սակայն դա ի զորու էր անել այն ժողովուրդը, որի դեկավարներն իրենց ներարկել էին վճռական մենակի հոգեբանությունը: Մինչդեռ, հայության քաղաքական հոսանքների մտայնության մեջ գերիշխող էր հոտային հոգեբանությունը եւ որպես հետեւանք՝

կողմնորոշումների գաղափարը: «Այս հոսանքներն արդեն արտահայտություն են ստացել մեր կյանքում իբրև՝ ռուսական կամ արեւմտյան օրիենտացիայի- խոսք կա անգամ Տաճկաստանի մասին - ձգտող քաղաքական խմբավորումներ, որոնց խելակորույս, ազգային տեսակետից անհմաստ բախումների հետեւանքով մեծապես դյուրացվեց Հայաստանի անկումը եւ բաժանումը Ուսւիո եւ Թուրքիո միջեւ», - գրում էր Նժեկը: Որքան անողոք է, նույնքան էլ անաչառ ու ընդգրկում հայ քաղաքական ուժերի գործունեության այս գնահատականը:

Ինչքան էլ ցավալի է, բայց 1915-ն էլ վերջնականորեն չսթափեցրեց հայ քաղաքական հոսանքներին: Նույն ախտն էր պատճառը, որ փաստորեն անկախացած Կիլիկիան իրեն հովանավոր ընտրեց Ֆրանսիային եւ հետագայուն ծախսվեց Թուրքիային: Նույն ախտն էր պատճառը, որ թույլ տրվեց անզիական զորքերի նուտքն Արցախ, ինչը վերջինիս կորսույան պատճառներից մեկը եղավ: Այդ ախտն էր պատճառը, որ Պողոս Նուբարը ոչ միայն միացյալ Հայաստանի ստեղծման գաղափարն էր կապում օտարների հովանավորության հետ, այլ նրա Վարչապետի, այսինքն՝ իր համար նստավայր էր ընտրել Փարիզը: Այդ ախտն էր պատճառը, վերջապես, որ հայունիքի համար օրիսական պահին անգամ ստեղծվում էին արեւմտահայերի ու արեւելահայերի առանձին դիվանագիտական խմբեր (Նուբար փաշայի ու Ա. Ահարոնյանի գլխավորությանք՝ 1919 թ. ամռանը, Փարիզում եւ Վ. Թեքեյանի ու Ա. Վրացյանի գլխավորությանք՝ Նույն թվականի վերջին, Երեւանում), որոնք այդպես էլ փոխընթռնման չեկան:

Ժամանակն անպտուղ վատնված էր եւ հայությունից պահանջվում էին հսկայական ջանքեր՝ ետ վերադարձնելու համար կողցրածը: Ստեղծված իրավիճակում, երբ Արեւմտյան Հայաստանը լիովին գրկվել էր հայ բնակչությունից, իսկ Արեւելյան Հայաստանը գտնվում էր ԽՍՀՄ-ի կազմում, դրա հնարավոր ճանապարհը Ցեղասպանության ճանաչումն էր:

\* \* \*

Հայոց Ցեղասպանության նկատմամբ աշխարհի ուշադրությունը հատկապես սրվեց 90-ականներին: Ուսւաստանի խորհրդարանում Պետական Դումայում, առաջին անգամ օրակարգի հարց դարձավ այն եւ արվեց դատապարտող հայտարարություն: ԱԱՆ նախագահը հանդես եկավ նմանատիպ մի հայտարարությամբ: Ֆրանսիայում կոմունիստները փորձեցին հարցը քննարկման առարկա դարձնել խորհրդարանում եւ նույնպես հայտարարություն արեցին այդ առիթով: Եվ, օ՛ զարմանք, Խսրայելի իշխանությունները դատապարտեցին Ցեղասպանությունն ու «հանձն առան» թույլ չտալ, որ երբեւիցե մոռացվի այն:

Սակայն, ի՞նչ է պատահել: Արբանացել է մարդկության խի՞նճը, մոտ է արդարության հաղթանակի ժա՞նը: Բնավ, երբեք:

70-ական թվականների երկրորդ եւ 80-ականների առաջին կեսին

նույնպես քաղաքական շրջանակներում մեծացել էր Ցեղասպանության հարցի նկատմամբ հետաքրքրությունը: Միացյալ Նահանգներում նախագահական ընտրարշավճերի մասնակիցները խոստանում էին, հաղթանակի դեպքում, ամեն ինչ անել, որ Ցեղասպանությունը պետականորեն ճանաչվի ԱՍՍ-ում եւ ողջ աշխարհում, սակայն հաղթանակից հետո սկսում էին «տառապել» հիշողության կորստով: ՄԱԿ-ի համապատասխան հանձնաժողովները մի քանի անգամ լսեցին հարցը, սակայն, ի վերջո, Թուրքիայի ջանքերի շնորհիվ եւ այլոց աջակցությամբ, այն փակվեց: Վերջապես Եվրախորհրդարանը ճանաչեց Ցեղասպանությունը, ինչը մինչ օրս մնում է խնդրո առարկայի վերաբերյալ ամենամեծ ծեռքբերումը: Սակայն այն ժամանակ արդեն բացահայտ էր, որ օտարները միայն շահարկում են հարցը՝ այն ծառայեցնելով իրենց այս կամ այն խնդրի լուծմանը: Եթե Միացյալ Նահանգները ՄԱԿ-ում հարցի քննարկումները «քննեցնելու» դիմաց զգալիորեն լինդայնեցին իրենց ռազմական հենակետերը Թուրքիայում, ապա Եվրոպական երկրները Եվրախորհրդարանի որոշումով չափավորեցին Եվրահամայնքի կազմում ընդգրկվելու՝ Թուրքիայի ախորժակը:

Սեր օրերում, երբ այդ երկիրը նորից չի թաքցնում իր ակնկալիքները ԱՍՍ-ից, երբ Խրայելին, ավելի քան երեւէ, պետք է չկորցնել սերտ հարաբերությունները մուսուլմանական աշխարհի գոնե մեկ ներկայացուցչի հետ եւ լուծել ոռոգման ջրի հիմնահարցը, երբ Ռուսաստանը պետք է սամձահարի Թուրքիայի նկրտումները՝ ոչ միայն նեղուցների միանձնյա տիրոջ դերի, այլև նախկին ԽՍՀՄ-ի մուսուլմանական շրջաններում հաստատվելու վերաբերյալ, նորից այդ երկրները հիշում են Ցեղասպանությունը: Ընդ որում, եթե հստակորեն դատապարտվում են թուրքական վայրագությունները, ապա «մոռացվում» է Յայրենիքի՝ այսօր Թուրքիայի տիրապետության տակ գտնվող հատվածի վերադարձի խնդիրը: Եկ դա բնական է, քանի որ օտարները ակնկալում են միայն Թուրքիայի հատուցումը՝ հարցն ավելի չխորացնելու դիմաց: Պատահական չէ, որ այսօր չի լսվում գորշ գայլի կատաղի ոռնոցը. Թուրքը զբաղված է հնարավոր նվազագույն գնով իր պահանջատերերի «բերանը փակելու» ճանապարհի որոնումներով:

Այո՛ կատարվածը բնական է եւ արդեն ոչ մեկ անգամ փորձված: Սակայն անբնական է մեկ այլ բան: Անկախացումից հետո Յայաստանը Թուրքիայի նկատմամբ որդեգրել էր այնպիսի քաղաքականություն, որը ստվերում էր թողնում Ցեղասպանության փաստը: Մինչ օտարները բազմիցս շահարկեցին այն, Յայաստանի իշխանությունները փորձում էին «բարիդրացիական» հարաբերություններ հաստատել արեւմտյան հարեւանի հետ: Ցավոք տարիներ պահանջվեցին հասկանալու համար, որ այդ քաղաքականությունը սնանկ է եւ չի կարող մեղմել Թուրքիայի լկտիությունը: Իրադարձությունների ընթացքը հաստատեց, որ սնանկ էր նաեւ այն պնդումը, թե Ցեղասպանության հարցի արծարծումը կարող է խան-

գարել Ղարաբաղյան խնդրի լուծմանը: Պատահական չէ, որ մի քանի ծանր հարվածներ ստանալուց եւ, իր վերջո, ԵԱՀԿ լիսաբոնյան գագաթաժողովում 53 երկրների դեմ մենակ մնալուց հետո, Յայաստանի դիվանագիտությունը՝ որպես դաժան պայքարում վերջին խաղաթուղթ, փորձում է օգտագործել Ցեղասպանությունը: Ըստ փոխարտօգործնախարար Վարդան Օսկանյանի, Յայաստանը 1997-ին ՄԱԿ-ում արձարձել է Ցեղասպանության ճանաչման խնդիրը: Սակայն չպետք է մոռանալ, որ հարցի արծարումն ինքնին հաջողություն չի կարող ապահովել: Որպեսզի այն ոչ միայն լուծվի, այլև նպաստի Ղարաբաղյան խնդրի հաջող ելքին, անհրաժեշտ է ճշգրտորեն սահմանել պահանջները եւ իրականացնել հսկայածավալ նախապատրաստական աշխատանք: Ղարաբաղյան խնդրի վիճակը վկայում է, որ Յայաստանի դիվանագիտությունը նախընտրում է «կես քայլերի» քաղաքականությունը եւ անպատրաստ է ներկայանում վերջնական հավաքներին, որտեղ ոչ թե վճռվում են հարցերը, այլ միայն հաստատվում են նախօրոք պատրաստված վճիռները: Դժվար է ասել, արդյո՞ք դառը փորձը դաս կլինի, սակայն ակնհայտ է, որ լուծվում են հայության համար բախտորոշ հարցեր եւ հետագա վարանումը կարող է հանգեցնել անդառնալի կորուստների: Յայաստանը պետք է գործի վճռականորեն եւ պահանջի ոչ միայն Ցեղասպանության ճանաչում, այլև բռնազարդված տարածքների վերադարձ: Միայն այդ դեպքում է ինաստալից խնդրի արձարծումը եւ միայն Յայաստանի անգիծում դիրքորոշման ու համապատասխան մարմինների լայնածավալ, հետեւողական աշխատանքի դեպքում է հնարավոր թե՛ Ցեղասպանության ճանաչումը, թե՛ Ղարաբաղյան խնդրի լուծումը, որոնք, ի վերջո, նույն նպատակի՝ հայրենատիրության երկու անբաժանելի մասերն են:

*Տիգրան Թորոսյան  
(1997թ.)*

## ԱԶԳԱՅԻՆ ՎՐԵԺԸ ԵՎ ՑԵՂԱՍՊԱՆՆԵՐԻ ՊԱՏԻԺԸ ԱՆԺԱՄԱՆՑԵԼԻ ԵՆ

«Եղեգնյա գրչով վրեժ երգեցի...»

Դ. Վարուժան

Կենդանական աշխարհում, վրեժը բնազդային օգացում է: Ի տարրերություն դրա, մարդկային վրեժը, խորքում լինելով բնազդային-օգացական, նաեւ գիտակցական երեւոյք է:

Արդարադատության հիմքը կազմող պատիժը, որը նախատեսված է հանցագործության կրկնությունը խափանելու, ոչ այլ ինչ է, եթե ոչ այդ գիտակցված վրեժի քաղաքակիրթ, «նուրբ» դրսեւորում:

Իրենք իրենց «քաղաքակրթության էտալոն» հայտարարող երկրներից ամեն օր ու ամեն վայրկյան քարոզներ են հնչում վրեժի անթույլատրելիության, նրա անասնային բնազդ լինելու, եւայլնի մասին: Նրանք անիրավված ու հայրենի տարածքներ կորցրած հավաքականություններին թելադրում են, հաճախ՝ նաեւ ստիպում (սերբեր, պաղեստինցիներ, հայեր, քրոներ...) մոռանալ պատմական անարդարությունը, մոռանալ ազգային արժանապատվության անպատվունը, մոռանալ պատմությունը վերջապես, վրեժխնդիր չինել, իրավունք եւ արդարություն չպահանջել ու քավարարել ներկայով եւ ունեցած-չունեցածով, չնտածել նույնիսկ իրենց ապագայի մասին: Լավագույն դեպքում, այս «խաղաղապաշտները» հորդորում են դիմել պայքարի ոչ բիրտ միջոցների, թղթե շերեփներով «հետապնդել» իրենց դատերը...

Մինչդեռ պատմության փորձն ու աշխարհի այսօրը մեզ հստակորեն սովորեցնում են այն պարզ ճշմարտությունը, թե՝ առանց երկարեշերեփի, առանց արյան հեղման՝ հայրենի տարածքներ չեն ազատագրվում եւ հայրենիքներ չեն կերտվում:

Ավաղ, այս ճշմարտությունը հայ ժողովրդի մեծագույն մասը, Հայրենիքում թե սփյուռքում, այսօր չի գիտակցում գինովցած ու հիմարացած արեւմտյան «խաղաղասիրական» քարոզչությամբ (ավելին. մեզանում էլ հայտնվել են նման քարոզչության մունետիկներ՝ «հելսինկյան կոնյտեների», կրոնական աղանդների ու նման գործակալական ցանցերի, նաեւ՝ Արեւմուտքի համալսարաններից շրջանավարտների մի զգալի մասի տեսքով): Ինչպես նշում է 20-րդ դարի հայ մեծագույն վրիժառուն՝ Շահան Նաբալին իր «Թուրքերը եւ մենք» աշխատության մեջ, թուրքերը մեզանից ավելի շատ եւ մեզանից շուտ հասկացան այս ճշմարտությունը եւ ուրիշների հազարամյա հայրենիքները նվաճելով ու

աջ եւ ահյակ ցեղասպանելով՝ այսօրվա Թուրքիան կերտեցին ու ձգտում են իրականացնել Մեծ Թուրանի ծրագիրը՝ մեջտեղից վերջնականապես վերացնելով դրան խանգարող «հայկական սեպը»:

Ազգերի պատմությունը, պատերազմները, եւ, ի վերջո՞ համաշ-խարիային պատմությունը վրեժների հաջորդական շղթաների պատմություն են ըստ եռթյան:

\* \* \*

Որ հանցագործին պետք է պատժել՝ համաձայն են բոլորը, նույնիսկ ամենանոլի խաղաղապաշտները:

Բայց հաղոց հետեւյաներն են՝ ինչպես ու ինչ չափով պատժել:

Սիա՞ այստեղ են սկսվում հակասությունները:

Ինչ վերաբերում է ցեղասպաններին պատժելուն՝ մեր պատասխանը հստակ է ու միանշանակ. հարկավոր է պատժել բոլոր միջոցներով, ամեն ձեւերով, անխնա՛ կերպով՝ առանց դույզն իսկ կարեկցանքի, եւ՝ ամենուրեք:

Սա իենց ինքը Վրեժն է:

Վրեժը ինքնին ահարկու պիտի լինի, որպեսզի լինի ազդեցիկ եւ հասնի նպատակին՝ թշնամու պարտությանը եւ ժողովրդին ցեղելուն, վերջին հաշվով՝ Յայրենակերտման: Նժդեհն իր հնարած մի հոյակապ բառով է բնորոշում այս գաղափարը՝ ահավարություն:

Վրեժը պետք է լինի նաեւ համընդհանուր, որպեսզի լինի արդյունավետ:

Պատմությունից գիտենք, որ արքաները սրի էին քաշում ոչ միայն դավաճաններին, այլև՝ նրանց տոհմն ամբողջությամբ:

Եթե զգաստորեն մտածենք՝ մեծ իմաստություն կա նման վարվելակերպի մեջ:

Անիրավողն ու անիրավողը չեն կարող հավետ իրար կողք-կողքի խաղաղ գոյակցել: Նրանցից մեկն ու մեկը պետք է վերանա ասպարեզից կամ ֆիզիկապես, կամ իր՝ այդպիսի կարգավիճակ կողող գիտակից էակի որակով: Նրանցից ով ավելի շուտ հասկացավ դա՝ նա առավել հավանականություն ունի վերապրելու այդ գոյապայքարից:

\* \* \*

Յայրենատիրության գաղափարը մեր մեջ արթուն պահելու համար, այսօր, մեր ազգային գաղափարախոսության մեջ պետք է վերջնականորեն ամրապնդվի՝ սերունդներին սրբազն վրեժի ոգով դաստիարակելու հրամայականը:

Մենք մեզ երբեւե հարց տվե՞լ ենք, թե ինչո՞ւ մեր մեծանուն գրողներից Դանիել Վարուժանը Վրեժի էր կոչում իր հայրենակիցներին.

«Եղեգնյա գրչով Վրեժ Երգեցի,  
Ընդ Եղեգան փող բոց Ելաներ» («Զոն»)

Մեր դպրոցներում ուսուցիչները երեխաներին այսօր բացատրում են արդյոք Վրեժի, բոցի ու արյան անհրաժեշտությունը Դայրենիքի ազատագրության եւ Դայրենիքի կերտման ու պահպանման համար: Չենք կարծում: Դրան փոխարինելու են եկել օտար շրջանակների փողերով ներմուծվող թույները՝ մարդու իրավունքներ, երեխաների իրավունքներ, քաղաքացիական հասարակություն եւ ննան պսպղուն պիտակների տակ:

Դամաձայն չենք Սիլվա Կապուտիկյանի այն մտքի հետ, որ մենք Վրեժ Եղեցի՝ լուծել՝ ապրելով: Ոչ, Վրեժը այդպես չեն առնում: Վրեժը թշնամուն անխնայորեն պատժելով, նրան ծնկի թերելով ու բարոյապես ոչնչացնելով, նրան իր ցեղասպանության համար կյանքից զրկելով է լուծվում: Սա շատ լավ էին գիտակ-ցել 19-րդ դարու Վերջի մեր ֆիդայիները. ի՞նչ անեին նրանք Սերոր Ալբյուրի սպանության, գլխատման ու հերոսի դիակի անպատվումի դիմաց: Ապրելով Վրեժ լուծեին, թե՝ Եվրոպական ու սուլթանական կառավարություններին թղթե շերեփներով դիմեին, ինչպես անում էին հայկական գավառների թեմակալ առաջնորդներն ու Կ. Պոլսու պատրիարքը: Ֆիդայական անգիր քրեական օրենսդրությունը գտավ ճիշտ պատիժը. Անդրանիկը գլխատեց Սերորի ոճրագործ Բշարե Խալիլին: Վե՛րջ:

Սա՛ է իսկական Վրեժը:

\* \* \*

Ցավոք, հայոց պատմության մեջ այնքան քիչ ազգային սրբազն Վրեժի դրսեւորումները մեզանում մոռացության են նատնված: Առավել մեծ ամոք է, երբ Վրիժառու արարդները չենք արձանագրում «ամաչելով», թե մեր մասին ի՞նչ կասեն «քաղաքակիրթ» ազգերն ու մարդկությունը:

Թքա՛ ամեն «քաղաքակիրթ» ու «քաղաքակրթականի» Վրա, եթե դա ուղղված է մեր ազգի ու ազգայինի դեմ, եթե դա մեր ժողովրդի, մասնավորաբար նոր սերնդի մեջ էլ ավելի է խորացնելու նահատակի կամ ապազգային աշխարհաքաղաքացու, այլ ո՛չ Դայրենատիրոջ եւ ազգային Վրիժառուի գիտակցությունը:

\* \* \*

Վրեժն անժամանցելի է:

Դրա դասական օրինակը տվել է հայոց իշխանապետ, սպարապետ Զաքարե Զաքարյանը: 8-րդ դարի սկզբին, արաբները խարեւությամբ իրենց մոտ են հրավիրում մի քանի հարյուր հայ նախարարների, զորականների ու սեպուհների, որոնց ուխտադրութեն լցնում են Նախի-

շեւանի Խրամ գյուղի Եկեղեցին ու ողջող այրում: Կես հազարամյակ հետո, Զաքարեն, գրավելով Արդարիլը, հրամայեց այրել այն մզկիթը, ուր պատսպարվել էին քաղաքի մեծամեծերը, ասելով. «Իշխանք՝ փոխանակ իշխանացն հայոց, զոր այրեցին այլազգիք ի Նախնուանի»:

Սա՛ է Վրեժը:

\* \* \*

Պարսից Շապուհ Բ. արքան նման խաբեությամբ իր մոտ հրավիրեց հայոց Արշակ Բ. արքային ու սպարապետ Վասակ Մամիկոնյանին: Նա Արշակին արգելակակեց Անհուշ բերդում, ու Վասակին հրամայեց մորթագերծ անել, մաշկի մեջ հարդ լցնել ու մշտական ցուցադրության դնել սպարապետին այնքան սիրող, շղթայված արքայի դիմաց: Վասակի որդին՝ Մուշեղը, ճակատամարտում հաղթելով պարսիկներին, մորթագերծ անել տվեց գերի ընկած պարսիկ մեծամեծներին ու հարդ լցնելով դրանց մաշկերի մեջ՝ «նվեր» ուղարկեց Շապուհին:

Սա՛ է Ազգային Սրբազն Վրեժը:

\* \* \*

Այս առթիվ ներկայացնենք անցյալ դարի հայկական վրիժառության մի շարք դրվագներ, որոնք, ի մեջ անոր մեր պատմագրության, կամ բնավ չեն արձանագրվել, կամ չեն արժանացել պատշաճ ուշադրության, իսկ ավելի հաճախ՝ գիտակցաբար ու դիտավորյալ անտեսվել են՝ «վայրենի» չերեւալու համար «քաղաքակիրթ» աշխարհի առաջ:

- Գրիգոր Թաթուլյան (մականունը՝ Ավշար):

20-ական թվականներին անձնապես հետապնդել է թուրք դահիճների եւ Յալեպից պարբերաբար բափանցելով գրավյալ հայկական տարածքներ՝ սատկացրել դրանցից շատերին: Նրա հուշերը հրատարակվել են Բեյրութում «Անթեղված գաղտնիքներ» խորագրով: Յերոսի մահից հետո, գրքի չքաժանված ողջ տպաքանակը, չգիտես ո՞ւմ մեղքով, հայտնվեց աղբանոցում...

- Յայության Նեմեսիսը (Նեմեսիսը Վրեժի աստվածն էր հունական դիցաբանության մեջ,- Գ. Յ.)՝ Շահան Նաբալի եւ նրա անմիջական գործակիցը՝ Գրիգոր Մերժանով:

Այս երկուքի տաղանդի ու համառ եւ հետեւողական աշխատանքի շնորհիկ, հետապնդվեցին եւ ահարեկվեցին թուրք եւ մուսավաթական դահիճներ՝ Արամ Երկանյանի, Միսաք Թորլաքյանի, Արշավիր Շիրակյանի, Սողոնն Թեհիլիրյանի, Ստեփան Շաղիկյանի եւ ուրիշ վրիժառուների բազուկներով:

Այսօր ո՞վ է հիշում այս հերոսների մասին (բացառություն է, մասամբ, Ս. Թեհիլիրյանը): Նաբալիի թաղմանը ներկա են գտնվել ավելի քիչ թվով հայեր, քան նրա դեկավարությամբ դժոխք են ուղարկվել

իթիհատական եւ մուսավարական թուրք եւ ադրբեջանցի պարագլուխներ: Նրանց անունով մեկ դպրոց կամ փողոց չի կոչվել Հայաստանի հայկական (?) Հանրապետությունում... Նրանց անունները անձանոթ են հայ նոր սերնդին:

- Վրիժառության հիանալի օրինակներ են տվել Հայկական լեգենդի մարտիկները Կիլիկիայի ազատագրությունից հետո, 1918թ.-ին: Նրանց վրիժառությունն ընդհանրապես անհայտ է մնում հայ պատմագրության համար, իսկ հատուկենտ գրված նյութերի մեջ՝ այդ մասին ակնարկվում է բացասական արտահայտություններով («նրանք չափն անցնում էին», եւն.):

Լեգենդականները եւ 1918-19թթ.-ին բնօրրան վերադարձածները Հաջնում հիմնովին բնաշինջ են արել իրենց սեփական ազգի գլխին պատուհաս դարձած, թուրքացած նախկին հայերի սերունդներին՝ «չանդո»-ներին:

Լեգենդականների վրիժառության պայծառ օրինակների մասին է վկայում Աղանայում ապրող ալեւի արար համայնքի ղեկավարներից, դեպքերի ականատես եւ անմիջական մասնակից Ահմեդ Ղալեր Ամին ալ-Տավիլը իր «Ալեւիների պատմությունը» գրքի (Բեյրութ, 1983 թ.) վերջին բաժնում, որը Կիլիկիայի 1918-21թթ. անցքերի ականատեսի վկայությունն է, եւ որը, ցավոք, մինչեւ օրս, որպես սկզբնաղբյուր անհայտ է մնում հայ հասարակայնությանը ընդհանրապես եւ հայ պատմագրությանը մասնավորապես: Ալեւի արար պատմագիրը, որի աշխատությունը լի է հակաթուրքական ոգով (սուննի թուրքերը դարերի ընթացքում ահավոր ցեղասպանության են ենթարկել ալեւիներին), գրում է, որ հայ լեգենդականները, անասելի վրիժառությամբ լցված, թուրքերին զցում էին հորերը, անխնայորեն կոտորում մեծին ու փոքրին, կոտորում ու հրկիզում նրանց բնակարանները: Թե որքան սարսափելի է եղել այդ վրիժառությունը՝ կարելի է դատել հետեւյալից. արար հեղինակը դժգոհում է, որ այս բոլոր գործողությունների ժամանակ հայերը երբեմն շփորում էին ալեւիներին եւ թուրքերին, երբեմն էլ նրանց միջեւ խտրություն չդնելով՝ բոլորի հետ նույն ձեւով էին վարվում:

Համանան փաստեր արձանագրում է Հակոբ Չոլաքյանը իր «Քեսար» աշխատության Ա հատորում (Յալեպ, 1995 թ.), թեև՝ ավելի «նուրբ» արտահայտություններով: Մեծ Եղեռնից ազատված եւ բնօրրան վերադարձ քեսապահները հարձակվում են շրջակայքի թուրք եւ թուրքնեն գյուղերի վրա, որոնք 1909 եւ 1915 թվերին հարձակվել էին Քեսարի եւ շրջակայքի հայկական բնակավայրերի վրա եւ «թուրքն է անցել այստեղից» արտահայտությունը վկայող հետքեր թողել: Դեպքերի ականատես եւ մասնակից Մովսես Շահբազյանն իր «Հայ կամավորական շարժումը առաջին աշխարհամարտին (1917-1920)» (Քեսար, 1965 թ.) գրքում, փոխանակ ճշմարտությունը գրելու, «ամաչում է» եւ հարկ է

համարում պարզաբանել. «...թուրքերը իրենց ձեռքը անցած հայերը սպանած էին, բայց մենք չարտօնեցինք այդ բանը մեր ժողովուրդին»:

Չենք հասկանում, թե ինչո՞ւ մենք պարտավոր էինք (Եւ այսօր պարտավոր ենք) մարդասիրություն ցուցաբերել, երբ թուրքերը մեզ բնաջնջելու ծրագիրն էին գործադրել (նրանից չեն հրաժարվել նաեւ այսօր):

-Հայկական վրիժառության ալիքը շուրջ կես դար «հանդարտությունից» հետո հանկարծ վերահայտնվեց ԱՍՆ-ի Սանտա Բարբարա քաղաքում: Իր ընտանիքի անարդ սպանությանը ականատես դարձած մի հայ ծերունի՝ Գուրգեն Յանիկյան, 1973թ. հունվարի 27-ին սպանեց Լու Անջելոսում թուրք հյուպատոսին եւ նրա փոխանորդին: Իր այս վրիժառությամբ Յանիկյանը հայտարարեց սկիզբը նոր տեսակի պատերազմ՝ «հայ անհատին պատերազմը թուրքին դեմ» եւ դարձավ սփյուռքահայ ժամանակակից ազգային-ազատագրական պայքարի հոգեւոր հայրը: 1975 թ.-ից հիմնվեցին եւ սկսեցին գործել «Հայաստանի ազատագրության հայ գաղտնի բանակ» (ԱՍԱԼԱ), «Հայկական ցեղասպանության արդարության մարտիկներ» (հետագայում՝ «Հայ հեղափոխական բանակ») եւ այլ կազմակերպություններ, որոնց մարտիկների վրիժառական գործողությունների թիրախը դարձան թուրք պետության ներկայացուցիչները եւ թուրքական հաստատությունները: Այդ հերոսների գործողությունների հիմնական խթաններից մեկը ազգային վրիժառության զգացումն ու դրա գիտակցումն էր: Այլապես, Մկրտիչ Մադարյանը չէր «գողանա» իր քրոջ աղքատիկ ուսկեղենը՝ ճանապարհի տոնս գնելու եւ անձնասպանական գործողությամբ մահապարտվելու համար 1982թ.-ի հուլիսին, Խսքամբուլի ծածկած շուկայում: Նույնը կարելի է ասել Անկարայի Էսեմբողա օդակայանում 1982թ.-ի օգոստոսին անձնասպանական գործողությամբ աննահացած Զոհրապ Սարգսյանի եւ Լեւոն Էկմեկչյանի, 1983թ. հուլիսին Լիսարոնի թուրքական հյուպատոսարանի հարձակման ժամանակ զոհված իինք տղաների, Փարիզի թուրքական հյուպատոսարանը 1981թ. սեպտեմբերին գրաված ԱՍԱԼԱ-ի չորս հերոսների եւ մյուս բազում-բազում հայտնի ու անհայտ մարտիկների մասին:

- Եվ, ի վերջո, ազգային սրբազան վրիժառության լավագույն օրինակ հանդիսացավ Խոջալուի ազատագրական գործողությունը 1992թ. կետրվարին: Սուլազայիթի, Կիրովաբադի, Բաքվի եւ այլ վայրերի հայերի արյան բաղնիքներից հարրած թշնամին կոտորվեց անխնայորեն, անողոքարար, մենք կասեինք՝ հայավարի:

Ոչ միայն պիտի հասկանանք, այլև՝ մեր սերունդներին պիտի դաստիարակենք, որ հայը, եթե հարկ լինի, կարող է նաեւ կոտորել եւ պետք է կոտորի:

Արդյո՞ք պատահական է, որ հայկական հաղթարշավը սկսվեց

Խոջալուով: Երբեք: Նախ՝ հայ զինվորը, հայ մարդը իր մեջ հաղթահարեց մորթվելու սահմանված ոչխարի բարդույթը, իսկ թշնամին հասկացավ, որ հայը կարող է իր ննան եւ իրենից էլ ավելի գիտակցել հայրենակերտման գաղտնիքը: Ցավոք, այսօր, ընդամենը իննը տարի ետք, մենք մոռացել ենք անգամ խոջալուն (այդ մասին մեզ ու աշխարհին հիշեցնում է ծեր աղվես Յեյդար Ալիեւը): Յերթական անգամ «ամաչում ենք»: Յանուն ինչի՞, արեւմտյան ժողովորավարությա՞ն, դրա արների՞: Մինչդեռ, մեր կարծիքով, Սարդարապատի ու Վարդանանցի նման, հայ սերունդներն իրենք իրենց պետք է ճանաչեն նաեւ խոջալուով:

Վերոշարադրյալ բոլոր օրինակներն ապացուցում են, որ ցեղասպանների պատիժը՝ ազգային վրեժինությունն է:

Յրեաներն իրենց վրեժինությունների պատմությունը շարադրել եւ սերունդներին այն ուսուցանում են որպես սուրբ, աստվածային գիրք:

Իսկ ե՞րբ պիտի ունենանք մե՛ր վրեժի կտակարանը, հայկական վրեժի սրբազնագույն պատմագիրքը:

Թե՞ նորից «ամաչելու» ենք օտարներից եւ... մենք մեզանից:

*Գեւորգ Ցազովյան*

## 1918 - 1921. ՀԵՏԱՂԱՐՁ ՀԱՅԱՑՔ

**Յայաստանի առաջին Յանրապետության պարտությունը  
և Լեռնահայաստանի հաղթանակը**

«Ժողովուրդների պատմությունն այլ բան չէ,  
քան իրենց գոյամարտի, իրենց հաղթությունների  
և պարտությունների պատմությունը»:

Գարեգին Նժեհ

*Ըստհանուր հայացքը գցելով 1918-21 թվականների հայտնի իրադարձությունների վրա և վերապելով հայոց ողբերգականն ու հերոսականը, փորձենք հասկանալ այն ժամանակվա մեր պարտությունների և հաղթանակների պատճառները՝ զնահատելու համար դրանց այժմեականությունն ու մեր այսօրը:*

1918-ի մայիս 28... Վեց դարերի խավարի վրա հառնում էր Եռագույնը՝ խորհրդանշելով Յայկական պետականության վերածնունդը:

Իսկ մինչ այդ տեղի էին ունեցել Մայիսյան պատմական ճակատամարտերը (1), և վերջնական բնաջնջման եզրին կանգնած հայությունը ոչ միայն հերոսաբար դիմադրել էր, այլև շանթող իր բազուկն էր իջեցրել ասկյարի սեխագլխին՝ նրան մատնելով փախուստի:

Յայ գենքը ցնծում էր... Թուրքերն առաջարկում էին հաշտություն:

Բայց զենքի փառքը խամրում է Բարումի դիվանագիտական սեղանների վրա: Թեև Յայաստանում զորքը պահանջում էր մերժել հաշտությունը և ժողովուրդն էլ կողմ էր կրիվը շարունակելուն, թիֆլիսի հայ քաղաքագետներից բաղկացած պատվիրակությունը, որ ղեկավարվում էր Կովկասի մայրաքաղաքում նստած Յայ Ազգային Խորհրդի կողմից, անտեղյակ ռազմաճակատի կացությանը, իր հաղթանակած սվինի փոխարեն, թշնամու ողորմածությանք էր գծում Յայոց պետության սահմանները, և հաշտագիրն ստորագրելուց հետո միայն, Վեհիբ փաշյից իմանում, որ հայ զորքը կռվել է հերոսաբար:

- Ահա՝ թե ի՞նչ չարիքներ են հասնում մի ազգի, որի քաղաքականությունը վարվում է սեփական հայրենիքից դուրս,- գրում է այս առիթով Յայկ Ասատրյանը:

Բաթումի դաշնագրով, Թուրքիան առաջինն էր ճանաչում Յայաստանի անկախությունը. անկախություն, որ պահանջում էին նաև իրենք՝ թուրքերը (2):

Անկախություն, որի փաստի առջև էր կանգնել Հայաստանը՝ Սեյմի լուժարումով, կանգնել ականայից, շվարած: Շվարել էր, քանզի թե՝ հոգեբանորեն, թե՝ քաղաքականորեն պատրաստ չէր դրան: Այս առումով, բավական անաշար են Ռուբեն Դարբինյանի վերագնահատումները.

«Սեր քաղաքական մտքի ապիկարության ամենից կարկառուն ապացույցը կրնա նկատվիլ Հայաստանի անկախության գաղափարի յուրացման տարապայման և տարօրինակ ուշացումը: Այն ժամանակ, երբ մեր կովկասյան բախտակից հարևան ազգերը, համաշխարհային պատերազմի բռնկումեն ի վեր, գիտակցաբար կպատրաստվէին իրենց երկրների քաղաքականության անկախության համար, ու երբ այդ բաղձալի նպատակի իրագործման համար ստեղծվեցին նպաստավոր պայմաններ, հաստատուն և վճռական քայլերով դիմեցին դեպի իրենց կանխատեսած նպատակը,-մենք հայերս, առանց կուսակցական խտրության, համկարծակի եկանք և՝ միայն ճարահատյալ համակերպեցանք մեր կամքեն անկախ կատարված փաստին, Հայաստանի անկախության:

Եվ հայկական անկախ պետության մեջ իսկ, դեռ երկար ժամանակ չկարողացանք մարսել մեր անկախությունը և դարձնել այն մեր գերագույն քաղաքական նպատակը... Իսկ մեր ժողովորդի լայն խավերը յուրացրեցին ու գնահատեցին այդ գաղափարը միայն այն ժամանակ, երբ մենք կորցրինք մեր անկախությունը»:

Հայաստանի անկախությունը հռչակված էր, բայց դեռ մի ամսից ավելի էլ պետք էր, որ Հայաստանի անդրանիկ կառավարությունն ու Հայ Ազգային Խորհուրդը բարեհաճէին Թիֆլիսից ժամանել Երևան: Անկախ ամեն ինչից, աստիճանաբար ձևավորվում էր պետական կյանքը, ու այդ գործում ի նշան երախտագիտության, հատկապես պետք է հիշատակել Արամին ու Դրոյին, որոնք «գլխավոր կերտիչն ու ոգին էին նորածին պետության»:

Բարումի հաշտության դաշնագիրը, ի միջի այլոց, պարտավորեցնում էր Հայաստանին՝ Բաքվից հեռացնել այնտեղ գտնվող հայկական ուժերը: Կատարե՞ց Հայաստանն իր պարտավորությունը, թե՞ ոչ, չգիտենք, բայց 1918թ. սեպտեմբերին Բաքվում 30 հազար հայեր մորթվեցին, որը թերևս հատուցումն էր տեղի Հայ. Ազգ. Խորհրդի մեծահոգության՝ դեպի «անմեղ» թուրք բնակչությունը, որ նույն տարվա մարտին տասնյակ հազարով լցված էր (հրականում պատսպարված Հայ. Ազգ. Խորհրդի ջանքերով) հայկական զորանցների մեջ: - Եվ ո՞վ ոճրագործ ջենտլմենություն,- կրացականչեր հայոց Նեմեսիսը,- դուռներուն վրա պահակ դրած էինք, որպեսզի քառսային տակնուվրայության այդ օրերուն, հայ արդարագույն վրեժինդրութենեն ապահով մնար հայությունը կոտորող այս զանգվածը:

Նույն «մեծահոգի ջենտլմենությունն» ենք տեսնում նաև Հայաստա-

նում՝ այստեղի թաթար-թուրքերի և վխտացող բոլշևիկների նկատմամբ:

1918թ. հոկտ. 30-ի Մուդրոսի զինադադարով՝ թուրքական զորքերի նահանջից հետո, Հայաստանը կարող և պարտավոր էր մաքրել վերագրաված տարածքները թուրքացեղ տարրերից: Բայց չարեց, քանզի չեր սերտել ազգակերտման ու հայրենակերտման պահանջները, իսկ թուրքերն ամեն կերպ հաջողացրեցին Նախիջևանի հարավի մաքրագործումը հայերից: Հավանաբար վախենում էինք, որ «քաղաքակիրթ» աշխարհը կդատապարտի. բայց չէ՝ որ թուրքերը դրանց չին վախենում...

- Մեկ անգամ միայն հայ-թուրք գոյանարտին մեջ հայր ցույց տվավ ազգ կազմելու իրական գենքը,- հետագայում գրում է Շահան Նաթալին՝ նկատի ունենալով Զանգիբրասարի մաքրագործումը 1920-ի ամռանը,- և միայն անոր արդյունք է այսօրվան հայկական մեծամասնությունը հողամասի մը վրա, որ ... Հայաստան է այսօր և հայությունը՝ ազգություն:

Իսկ Հայաստանի խորհրդարանում, ամոր չինի ասել, ոմանք բողոքում էին «քուրք խաղաղ ժողովրդի» կոտորածի դեմ: Իսկ այդ թուրք ժողովուրդը վճռականորեն, Հայաստան պետության մեջ պետություն էր ստեղծում. Արաքսի երկայնքով, իր մեջ ընդգրկելով Շարուրի, Զանգի և Վեդի Բասարների շրջանները, ձևավորվում էր այսպես կոչված «Արաքսյան հանրապետությունը»՝ իր սեփական զորքով և օրենքներով: Եվ այս ամենը հանդուրժվում էր...

Հանցագործ բարեհոգություն էր դրսեսրվում նաև բոլշևիկների ու նրանց կողմից տարվող հակաբետական (իմա՝ հակահայկական) քարոզչության նկատմամբ: Այդ քարոզչության հաջողությունը, որ բարոյալքեց բանակն ու ժողովրդին, հետևանք էր դեպի բոլշևիկները՝ իշխանությունների խիստ հանդուրժողական և ներողամիտ կեցվածքի: Նույնիսկ կառավարության մեջ կային մարդիկ, որոնք տարակուսում էին, թե «ինչպես ձերբակալել մեզ պես ընկերվարական կոմունիստներին», իսկ խորհրդարանի էտո պատգամավորները բողոքում էին մի քանի բոլշևիկ ձերբակալելու «ապօրինի» որոշման դեմ: Հայաստանը դեմոկրատական երկիր էր...

Այնքան միամիտ ու անհեռատես էին Հայաստանի վարիչները, որ ամենուրեք հալածվող բոլշևիկներին «գրկաբաց» ընդունեցին՝ թույլ տալով նրանց ապրել և աշխատել Հայաստանում: Իսկ վերջիններս էլ, ի հարկե, խոսք տվեցին հակաբետական, դավադրական քայլեր չանել: Սակայն ... տրամաբանական էր, որ պիտի անիմ: 1920 թվականի մայիսի առաջին օրերին, մի քանի տասնյակ բոլշևիկներ կարողացան կազմակերպել (առանց դրսի օժանդակության) Ալեքսանդրապոլի երկարուղային կայարանի գրավումն ու տիրանալ զրահակի գնացքին... Այդքան թույլ ու անտեսյակ էր մեր կառավարությունը:

Թեև ապստամբությունը ճնշվեց, սակայն այն թողեց մի շարք հետևանքներ, որոնցից ամենածակատագրականը եղավ հայկական

բանակի (նաև ժողովրդի) բարոյալքումն ու քայբայումը: Այո՛, դավադրությունը ճնշվեց, բայց չէ՞ որ կառավարությունը կարող էր նախօրոք դրա դեմն առնել: Չէ՞ որ մինչև 1920թ. մայիսը, «Սպարտակյանները» հասցրել էին արդեն հակապետական թռուցիկներ փակցնել պատերին, որի մասին կառավարությունը տեղյակ էր, բայց չեր դիմում վճռական միջոցների... Խոսքի ազատություն էր:

Արդյունքում, պետական հստակ ծրագրերի չգոյությունն ու երևությունը կանխատեսելու ընդունակ պետական այրերի գրեթե բացակայությունը, վերջին հաշվով, հանգեցրին նրան, որ պետականության լիարժեք կայացում այդպես էլ տեղի չունեցավ: Վարչապետ Յովհաննես Թաջագործությունին հետագայում արդարորեն խոստովանում էր. «Եթե ճիշտ է, որ կառավարել՝ ասել է նախատեսել, ապա ուրեմն մենք միանգամայն անպետք կառավարիչներ ենք եղել, որովհետև հենց այդ նախատեսելու ընդունակությունն է, որ չենք ունեցել բնավ... Ապա չենք ունեցել որոշ ու հստակ գիտակցություն մեր անելիքի մասին, չենք ունեցել մի դեկավարող սկզբունք ու տևողական, հետևողական սիստեմ, գործել ենք կարծես հանկարծակի ու պատահական ներշնչումների տակ... Չենք հասկացել դժվարությունների մեջությունը, արհամարիել ենք հակառակ ուժերը և թերևանտության աստիճանի անփուլք ենք եղել մեզ սպառնացող վտանգների հանդեպ... Չենք կարողացել տարբերել պետությունը կուսակցությունից ու կուսակցական մտանություն ենք մտցրել պետական կյանքի մեջ»:

Մինչ Փարիզում միևնույն դատը պաշտպանող երկու առանձին, անհաշու պատվիրակություններ վիճում էին Յայաստանի սահմանների մեջության շուրջ և ցնծում էին թղթի վրա արձանագրված Սկրի՝ ոչ մի իրական արժեք չունեցող բարոյական հատուցմամբ, մեր թիկունքում կնքված թուրք-բոլշևիկյան դաշինքը գալիս էր արագացնելու Յայաստանի անկումը:

Արևմուտքի նկատմամբ չարդարացված նվիրումով այն աստիճան էր կուրացած կառավարությունը, որ միամտաբար հավատում էր, թե ինչո՞ր «յանկի» կարող է Յայաստանի համար կայուն և իրական սահմաններ գտել: Եվ պիտի այպահնել այն դեկավար հայերին, որոնք ընդունակ չեղան ընթրունելու միլլիական շարժման թափը, արհամարիեցին այն, և, հետևելով Եվրոպական գործիչներին, քեմալը հասարակ ավազակ կարծեցին:

1920թ. սեպտեմբերին սկսվեց Յայ-թուրքական պատերազմը: Այն անխուսափելի էր, բնական ընթացք գոյության պայքարի՝ մղվող միմյանց եռությամբ հակոսնյա երկու ցեղերի միջև: Այս առումով, սխալ պիտի համարել «հետաղարձ մարգարենությամբ» արված այն պնդումները, թե նախապես քեմալի հետ բարեկամանալով՝ Յայաստանը կիսուսափեր պատերազմից: Ի՞նչ է, քեմալը պիտի սպասեր, թե ե՞րբ են հայերը ավելի հզորանալու...

Քենալի 25 հազարանոց բանակի դեմ Յայատանն ուներ լավ զինված և հազնված 40 հազարանոց բանակ, որի զգալի մասը, սակայն, կազմում էին հապճեպով զորակոչված ու ընդամենը քանակ ավելացնող պատրաստի դասալիքները. բանակ, որ բարոյալքվել էր դեռ մայիսյան ապստամբության օրերին, բարոյալքվել ներքին թալանների ու բոլշևիկյան քարոզների պատճառվ: Եվ այս ամենի համար հանցավոր էին ոչ այնքան կրվող զինվորները, որքան քաղաքական դեկավարությունն ու զինվորական նախարարությունը հատկապե՞ս. նախարարություն, որի քրի տակ Ղուկաս Ղուկասյանի պես անհայրենացածները բանակում «կարմիր թուրքերի դեմ» չկրվելու քարոզություն էին ծավալում:

Յոկտեմբերի 30-ին, մի քանի ձևական կրակոցներից հետո, Կարսի անառիկ թվացող ամրոցը հանձնվեց թուրք «եղբայրներին», և այդ անպատճիվ անկման պատասխանատվությունը միայն մեկ մարդ քավեց՝ գնդապետ Մագնանյանը, որ ասպետաբար ինքնասպան եղավ:

Սակայն Կարսում պարտվողը միայն հայկական բանակը չէր, այլ ողջ հայությունը, որը իր ընդհանրության մեջ արիության ու մարտունակության մկրտություն չստացավ:

Մոտենում էր Յայատանի խորհրդայնացումը, ու Խորհրդային Ռուսաստանը ամեն միջոցով արագացնում էր այն: Եվ նոյեմբերի վերջին Յայատանի կառավարությանն ուրիշ բան չէր մնում, քան ընդունելու Ռուսաստանի պայմանը՝ Երկիրը հանձնել բոլշևիկներին: Այդ պայմաններում Յայատանի խորհրդայնացումն, հավանաբար, անխուսափելի էր, և դժվար թե թուրքերից պարտված հայկական բանակը կարող լիներ դիմակայելու Ռուսաստանի ծավալմանը: Սակայն, եթե Յայատանի Յանրապետությունը արժանապատվորեն կրվեր և հաղթեր Քենալին, կարելի է ասել, որ Ռուսաստանը Յայատանի՝ որպես կարող ուժի հետ հաշվի՝ կնստեր, և, թեկուզ խորհրդային, Յայատանի տարածքներն ավելի լայն կլինեին: Անշուշտ, բոլշևիկները «արևմտյան իմպերիալիստներին» Առաջավոր Ասիայից դուրս մղելու ակնկալիքով էին դաշնակցում Քենալի հետ, բայց պետք է ասել նաև, և սա էական է, որ դաշնակցում էին ազգային շարժման դեկավարի հետ, որը կարողացավ անկյալ վիճակից հանել Թուրքիան և ոչ մեծաթիվ բանակով հաղթանակներ տանել նախ հայկական, ապա հունական ճակատներում:

Այնինչ Յայատանի Յանրապետությունը պարտվեց: Եվ այդ պարտությունն արձանագրվեց դեկտեմբերի 2 - լուս 3-ի գիշերը՝ բոլշևիկյան դավադրական միջնորդությամբ կնքված Ալեքսանդրապոլի պայմանագրով, ուր թուրքերը, «ինտերնացիոնալի» երաժշտության ձայների ներքո, հաղթական արհամարհանքով, մի քանի ամիս առաջ 56 հազ. քառ. կմ. տարածքով Յայատանին էին թողնում ընդամենը 11 հազ. քառ. կմ. հողակտոր:

Ինչո՞ւ պարտվեց Յայատանի Յանրապետությունը. թուրք-բոլ-

շկիկյան գինակցությո՞ւնն էր պատճառը, ճակատագրի հեգնա՞նքը, բոլշևիկյան քարոզչությո՞ւնը, Եվրոպայի դավաճանությո՞ւնը, խորհրդայնացման ուշացո՞ւմը... (3)

Թերևս սրա լավագույն պատասխանը տալիս է Հայաստանի առաջին վարչապետ Յ. Քաջազնունին. «Բոլշևիկների դավադրությունը չէր մեր պարտության պատճառը, ոչ իսկ թուրքերի ուժը (որ շատ էլ մեծ չէր այն ժամանակ), այլ մեր սեփական ապիկարությունը»:

Հայաստանի Հանրապետությունը պարտվեց ժողովրդի և հատկապես բանակի մեջ ԱԶԳԱՅԻՆ ՈԳՈՒ ՊԱԿԱՍԻՑ: Ո՞ւմ մեղադրենք, որ մեր 40 հազարանոց բանակը քարոյալքված էր և անկարող դիմակայելու 25 հազարանոց զորքին: Ազգային ոգու պակասն էր, որ պարարտ հող էր ստեղծել բոլշևիկյան քարոզչության համար. ոգու պակաս, որը դավադրությին թույլ էր տալիս գինվորների մեջ հեշտությամբ բթացնել կովելու կամքը, իսկ ստամոքսով մտահոգված ժողովրդին, նույնքան հեշտությամբ խարել հացառատ խոստումներով: Այդ ոգու պակասն էր, որ հայության տարանուն հատվածներին, սեփական ուժերին ապավինելու փոխարեն, նետել էր օրիենտացիաների գիրկը. ոմանք հավատարմագրվել էին անգլիացիներին,- որոնք հայերին դիտում էին իբրև անուղղելի ռուսասերներ, իսկ թուրքերին՝ հուսալի պատվար Ռուսաստանի դեմ, - ոմանք ռուսներին, որոնք ավելի շահագրգուված էին օգնել «արևմտյան իմաստիալիզմի դեմ պայքարող» Քենալին, քան գնդապետ Յասկելի խորհուրդներով առաջնորդվող և Առաջավոր Ասիա ամերիկյան թափանցմանը ակամա օժանդակող հայերին...

Իսկ նրանք, ովքեր գերծ օրիենտացիաներից, իսկ ավելի ճիշտ՝ հայկական կողմնորոշմամբ՝ ապավինել էին սեփական ոգու զորությանը, Զանգեզուրի լեռներում Հայոց Դյուցազնականն էին կերտում:

\* \* \*

Մինչ Հայաստանի Հանրապետության կառավարությունը Լեզրանի հետ համաձայնության էր Եկել՝ Զանգեզուրը Աղոքեցանին հանձնելու, և մինչ ստեղծվում էր «Ճախ»-երից բաղկացած նոր կառավարություն երկիրը Կարմիր բանակի խնամակալության տակ դնելու (4) և իշխանությունը լավագույն ձևով բոլշևիկներին հանձնելու համար, Բալկաններում և Ղարաբիլիսայում արդեն հերոսացած, մտածող մի գինվորական, առաջնորդելով մի բուռ հայորդների, վարում էր Սյունիքի հերոսամարտը:

Այդ ժանր օրերին Նժդեհը հղացավ և գործի դրեց փրկարար Դավիթբեկյան Ռիխտերը: 1920թ. օգոստոսի 25-ին, Կապանի Կավարտ գյուղի Եկեղեցում, Նժդեհի գինվորները Դավիթ-Բեկի անունով ուխտեցին «հավատարիմ մնալ հայերնի երկրի ազատության, իրենց հրամանատար Նժդեհին և կովել մինչև վերջին շունչը»:

Առանց դրսի օժանդակության, ապավիճած հայրենի լեռներին ու սեփական ոգու զորությանը, Սյունիքի հայությունը, Նժդեհի ղեկավարությամբ, վարեց իր հաղթական ոյուցազնամարտը: Լեռնահայության դիմումներին՝ որևէ կերպ օգնելու, ՀՀ կառավարությունը, բացի մեկումեջ արվող քաջալերանքի կամ համակրանքի խոսքերից, ոչ մի կերպ չարձագանգեց:

Ավելին, դեռ 1920 թվականի օգոստոսին, ՀՀ գինվորական նախարար Ռուբեն Տեր-Մինասյանը, բոլշևիկների հետ կնքած զինադադրի համաձայն, Դրոյի միջոցով հեռագրում էր Նժդեհին՝ թողնել կապան ու Գենվազը և անցնել Երևան: Բայց Նժդեհը, չընդունելով ՀՀ գինվորական նախարարի՝ Զանգեզուրը թողնելու հրամանը և մերժելով Դրոյի առաջարկը՝ անցնել Երևան ապաքինվելու (Գորիսի ձորում վիրավորվել էր), նախընտրեց մնալ Սյունիքում և մեռնել, քան մենակ թողնել լեռնահայությանը:

Քացահայտած թուրք-բոլշևիկյան միացյալ դավադրությունը ու չընդունելով ՀՀ կառավարության կրավորական կեցվածքը, որը Մոսկվայի ներկայացուցիչ Լեգրանի հետ կնքած համաձայնագրով փաստորեն Զանգեզուրը Ադրբեյջանին հանձնելու նախաքայլ էր անում, Սյունիքը շարունակեց կրիվը և Հայաստանի խորհրդայնացումից հետո, 1920թ.-ի դեկտեմբերին, իրեն հռչակեց ինքնավար:

1921թ. հունվարին, Դրոյ Բաքվից մի հեռագիր հղեց Նժդեհին՝ առաջարկելով նրան թույլ տալ Զանգեզուրի խորհրդայնացումը, հավատացնելով և վստահեցնելով, որ այդպիսով Մոսկվայի առաջիկա կոնֆերանսում, ուր լուծվելու էին նաև վիճելի հողային հարցերը, խորհրդային Ռուսաստանը բարյացակամ կլինի դեպի Հայաստանը և կպաշտպանի հայ աշխատավորության շահերը: Այս անգամ ևս, Նժդեհը, իբրև հեռատես քաղաքագետ, չհեռացավ Սյունիքից և շարունակեց մաքառել:

Իսկ Հայաստանի խորհրդայնացված մասում տիրում էին բոլշևիկյան սանձարձակությունն ու վայրենությունը, և կարմիր կոմիսարները «դասակարգային թշնամիների» արյան պահանջված քանակն էին հեղում: Եվ ցեղի ոգին պոռքվաց... Հայության ընբուժ ընտրանին, որի մեջ մեռած չէին ցեղային հպարտությունը, բռնության նկատմամբ անհանդուժողականությունը, բնական մղումով՝ ցեղի ոգու կանչով, ընդգամեց: Թիկունք ունենալով Լեռնահայաստանը, խորհրդայնացված ժողովուրդը, 1921-ի փետրվարին, ապստամբությամբ տապալեց բոլշևիկյան բռնատիրությունը:

Ապստամբությունը ի վերջո ճնշվեց. Աերքին այդ կրիվների ընթացքում մոտ 20 հազար հայեր զոհվեցին: Սակայն, շնորհիվ ապստամբության, բոլշևիկյան կացնից փրկվեց մեր մտավորականության զգալի մասը, մտավորականություն, որը հետագայում անգնահատելի ավանդ ունեցավ

Սիյուռքի հայապահպանման գործում (5): Ի հարկե, փրկվեց նաև մեր արժանապատվությունը...

Սակայն, նույնիսկ Փետրվարյան ապստամբության պարտությունը և դրա հետևանքով՝ 12 հազար գաղթականության (որից՝ 4 հազարը զորք) նահանջը, - որոնք զգալիորեն ազդեցին Լեռնահայության բարոյահոգեբանական վիճակի վրա, - չընկեցին Սյունիքին, և նա շարունակեց իր հաղթական կրիվները. ապրիլին հոչակվեց Լեռնահայաստանի Հանրապետություն՝ սպարապետ Նժեթիկ վարչապետությամբ:

Յունիսի 1-ին, Զանգեզուր անցած ՀՀ կառավարության նախաձեռնությամբ, Լեռնահայաստանը հայտարարվեց Հայաստան՝ Սինոն Վրացյանին նշանակելով վարչապետ (Նժեթիկ մնում էր սպարապետ): Նոր կառավարությունը թույլ տվեց մի շարք կոպիտ սխալներ, որոնց մեջ ամենից ճակատագրականը եղավ երեք հազար բարար-քուրքերի՝ իբրև քոչվոր, իսկ իրականում որպես ծատոյալ դավադիրներ, Սիսիան ազատ մուտքի արտոնումը: Իսկ Երևանից նահանջած զորքը կամավոր անձնատուր եղավ կարմիրներին:

Վրաստանի ու Հայաստանի բոլշևիկացումը, Արարատյան գաղթականության՝ դեպի Սյունիք նահանջը, մասնավորապես, նահանջող մտավորականության և երիտասարդության վաղաժամ անցնելը Պարսկաստան, բարոյալքիչ ու հորի ազդեցություն ունեցած Լեռնաշխարհի հայության վրա: Մյուս կողմից, պարենի ու հացահատիկի չգոյությունը, վարչական և զինվորական մարմինների միջև առաջ եկած անհամաձայնությունները իրենց բացասական դերը կատարեցին: Այս պայմաններում, միաժամանակ, խուսափելու համար ավելորդ հալածանքներից, որոնց կարող էր ենթարկվել Խորհրդային Հայաստանի հայությունը, և հաշվի առնելով, որ Հայաստանի բոլշևիկյան դեկապարությունը իր 1921թ.-ի հունիսի հոչակագրով Սյունիքը հայտարարում էր կցված մայր Երկրին, հուլիսին Լեռնահայաստանը տեղի տվեց Խորհրդայնացման առաջ: Թողմելով Զանգեզուրը՝ Նժեթիկ հրաժեշտին հավաստեց լեռնահայությանը, որ ինքը ընդմիշտ չի հեռանում և պիտի վերադառնա, եթե Երևանի փոխարեն Բաքուն լինի Սյունիքի տերը: Իսկ Խորհրդային Հայաստանի Նեղկոմին ուղղած իր դիմումը հաղթական սպարապետն ավարտում էր սաստող տողերով. «Ուուր գիտեք, որ ցանկության դեպքում ես միշտ էլ հնարավորություն կունենամ մի քանի տասնյակ զինվորներով վերագրավել Լեռնահայաստանը: Որպեսզի այս երկրի աշխատավոր գյուղացիությունը ստիպված չլինի մեկ էլ ինձ օգնության կանչելու, աշխատեք բավարարել հայ գյուղացիության և նրա մտավորականության արդար պահանջը»:

Երկու տարվա կրիվների ընթացքում, թշնամու 15 հազար սպանվածի դիմաց Սյունիքը տվեց ընդամենը 20 զոհ, իսկ մոտ 200 գյուղեր մաքրագործվեցին թուրքերից ու վերադարձվեցին հայերին:

Ծնորհիվ Լեռնահայստանի հերոսամարտի, հնարավոր եղավ՝  
ա) փրկել լեռնահայությանը կոտորածից,  
բ) Սյունիքը կցել Մայր Յայրենիքին՝ մահացու անդամահատումից  
գերծ պահելով Յայաստանը (6),  
գ) հոգեբանորեն և ռազմագիտորեն հնարավոր դարձնել  
Փետրվարյան ապստամբությունը,  
դ) ապահովել հայ մտավորականության և մարտական ուժերի  
նահանջը ու անցումը Պարսկաստան:

Ամփոփելով, փորձենք զուգադրաբար ցույց տալ այն գործոնները,  
որոնք, ի վերջո, հանգեցրին հանրապետության պարտությանն ու  
Սյունիքի հաղթանակին:

Մինչ Յայաստանի Յանրապետությունը որդեգրել էր արևմտյան  
կողմնորոշում, Լեռնահայստանն առաջնորդվում էր՝ սեփական ուժի և  
ոգու գորությանն ապավիճելու սկզբունքով:

Եթե ՀՀ-ն իր քաղաքականության շեշտը դրել էր դիվանագիտության  
վրա և հաճախ ստիպված էր լինում ընդունել թելադրվող անբա-  
րենպաստ պայմանները, ապա Լեռնահայստանը, ելակետ ընդունելով  
ուժի քաղաքականությունը, ինքն էր թելադրում պայմանները: Եվ եթե  
ՀՀ-ը հիմնականուն հավատարիմ մնաց ի սկզբանե որդեգրած իր  
կրավորական կեցվածքին, ապա՝ Լեռնահայստանը հաղթեց նաև իր  
վստահ ներգործականությամբ:

ՀՀ-ն ուներ մեծաքանակ, լավ զինված, բայց բարոյագրկված  
բանակ, Լեռնահայստանը՝ թեև փոքրաքանակ, պակաս հագեցված,  
բայց ոգեշն բանակ:

ՀՀ-ը հետևողական չեղավ երկիրը թուրք-թաթարներից մաքրա-  
գործման մեջ, մինչ Սյունիքը վճռական գտնվեց գյուղերի թուրքաթափ-  
ման գործում:

Եթե ՀՀ-ը չուներ ազգային քարոզչություն և հանդուրժում էր  
բոլշևիկյան քարոզչությունը, ապա Լեռնահայստանը առաջնորդվում էր  
ցեղային գաղափարներով և դրանցով դիմագրավում բոլշևիկյան  
ազգաներժ քարոզչությանը:

Օրիասական այդ տարիներին, երկուսուկես տարվա ընթացքում,  
ՀՀ-ը փոխեց չորս կառավարություն, որտեղ Միշտ բացակայեց ուժեղ  
ձեռքը, իսկ Լեռնահայստանը ունեցավ կարող առաջնորդ, որը ան-  
վախորեն ստանձնեց լեռնահայության ճակատագրի պատասխա-  
նատվությունը:

Արդյունքում, Յայաստանի Յանրապետությունը պարտվեց ազ-  
գային ոգու պակասից, իսկ Լեռնահայստանը հաղթեց այդ ոգու  
դրսևորման շնորհիվ:

1. Տեղին է Ծկատել տալ, որ իրավամբ արժանին մատուցելով Սարդարապատին, մի տեսակ ստվերում են ննացել Բաշ-Ապարանի և Ղարաբիլսայի կոհվները (հատկապես Վերջինը, որ իր հերոսականությամբ և վճռորոշությամբ ոչնչով չի գիշում Սարդարապատին): Դա, հավանաբար, պայմանավորված է խորհրդային պատմագիտության ազդեցությամբ, որը լուսաբանելու համար Ղարաբիլսայի ու Բաշ-Ապարանի կոհվները, ստիպված պիտի լիներ նաև մեծարելու դրանց «անցանկալի» հերոսներին (իմա՞Նժեկին ու Դրոյին), մի բան, որ համեմատաբար ոյուրին էր Սարդարապատի պատմաշինության հարցում:

2. Թեև, հաշտության բանակցությունների համար նախապայման դնելով անկախության հայտարարումը (մայիսի 28-ին հայերն ընդունեցին թուրքերի պայմանը և պատվիրակությունը ուղարկեցին Բարտում), թուրքերը նպատակ ունեին իրենց և Ռուսաստանի միջև, ապահովության համար, միջանկյալ (բուժերային) պետություններ ստեղծել, այդուհանդերձ, եթե չլինեին մայիսյան հերոսական կոհվները, թուրքերը ոչ միայն չին համաձայնի Հայաստանի անկախության հետ, այլև կփորձէին ավարտին հասցնել 1915-ի սկ գործը:

3. Չենք կարծում, որ ավելի շուտ ընդունելով խորհրդային կարգերը (ինչպես դա արեց Աղրբեջանը), Հայաստանը շահած կլիներ: Այն փաստը, որ խորհրդային Ռուսաստանը չաշակցեց Հայստանում մայիսյան ապատամբությանը, խոսում է այն մասին, որ ռուսները արդեն դաշնակցել էին Թուրքիայի հետ, նրան էին ընտրել իրեն գործակից՝ միջազգային ինպերիալիզմի դեմ պայքարում:

4. 1920թ. օգոստոսի 10-ին Բորիս Լեգրանի և Արշակ Զամայանի միջև Թիֆլիսում կնքված համաձայնագրով, ՀՀ-ն իր համաձայնությունն էր տալիս Կարմիր բանակի մուտքին Զանգեզոր, Ղարաբաղ և Նախիջևան:

5. Բավական է թվարկել Շանթի և Աղբայանի հիմնած «Համազգային Հայ Կրթական և Մշակութային Միություն»-ը և վերջինիս ճեմարանը Բեյրութում, Ռ. Ղարբինյանի խճանքած, առայսօր չգերազանցված «Հայրենիք» պարբերականը:

6. Երբեմն կարծամտորեն պնդվում է, թե առանց Նժեկի վարած կոհվների էլ խորհրդային Ռուսաստանը Զանգեզորով կրողներ Հայաստանին, քանզի, հակառակ դեպքում, Նժեկի հեռանալուց հետո, այն կարող էր կցել Աղրբեջանին: Սակայն... Պետությունների միջև կնքվող պայմանագրերը հաստատում և արձանագրում են նրանց միջև տվյալ պահին առկա սահմանները, և եթե 1921թ. մարտի 16-ի ռուս-թուրքական պայմանագրի նախօրյակին Զանգեզորում լինեին ոչ թե Նժեկի մի խումբ ուխտաները, այլ Կարաբերիի ասկյարները (և այդ դեպքում ոչ միայն շատ գյուղեր թուրքաբնակ կլինեին, այլ մնացածներն էլ՝ հայաբարի), միանշանակ կարելի է պնդել, որ Ռուսաստանը Սյունիքը կարժանացներ Նախիջևանի ու Ղարաբաղի ճակատագրին: Ավելին, Սյունիքը Աղրբեջանին թողնելուց հետո, արդյո՞ք խորհրդային Ռուսաստանը հետագայում կիանդուրժեր Հայաստանի իրեն առանձին խորհրդային հանրապետության գոյությունը, թե՝ այն կտարդալուծեր Վրաստանի և Աղրբեջանի մեջ:

*Մուշեղ Լալայան*

**ՀԱՅԱՍՏԱՆԻ ՀԱՆՐԱՊԵՏՈՒԹԻՒՆԸ  
ԵՒ ԱՆՈՐ ՏԵՂԸ ՀԱՅՈՑ ՊԱՏՄՈՒԹԵԱՆ ՄԵԶ  
(տպագրվում է որոշ կրծատումներով)**

*Յիւրս եկմ եւ իւրքն զնա ոչ ընկալան: Իսկ  
որքն ընկալան զնա՝ ետ նոցա իշխանութիւն  
որդիս Ազատութեան լինել:*

Թող թոյլ տրուի մեզ Աւետարանչին խօսքը մեկ փոքր բայց կարեւոր փոփոխութեամբ գործածել Անկախ Հայաստանի խաչեցեալ հանրապետութեան համար: Դարերու երազանքէ, հառաջանքէ եւ տառապանքէ յետոյ եկաւ Ազատ Հայաստանը, ապրեցաւ 1918-էն 1920, երկութուկես տարի, բայց իրենները չընդունեցին զայն:

Ապշեցուցիչ եւ անհաւատալի բան: Հայաստանի Հանրապետութիւնը չընդունողները օտարները չեն, այլ հայ մարդիկ: Ստեղծուած գերմարդկային ճիգերով, արտակարգօրէն դաժան պայմաններու տակ, ան ճանչցուեցաւ իրապէս եւ իրաւապէս աշխարհի գրեթէ բոլոր պետութիւններէն, մէջն ըլլալով Ռուսաստանն ու Թուրքիան: Մասնակցեցաւ որպէս «փոքր դաշնակից» Սեւրի խաղաղութեան համաժողովին, որ լուծարի կ'ենթարկէր պարտեալ եւ ոճրապարտ Թուրքիան: Բայց հայ ժողովուրդի ոչ-անկարեւոր մեկ մասը չճանցաւ զայն, երբ կ'ապրէր ան իսկ այսօր ալ կ'ուրանայ անոր երբեմնի գոյութեան փաստն անգամ, երբ չի հայինքր անոր յիշատակին: Իր ողջութեան, քանակիրանքով կը կոչէին զայն «Արարատեան Հանրապետութիւն», «Երեւանեան Հանրապետութիւն» եւ, վերջապէս, «Անոնց Հանրապետութիւնը»: Հայկական տերիտորիայի եւ սեփական պետականութեան ստեղծման մեծ եւ անգերազնահատելի գործը, զոր 1918-1920 թուականներուն կատարեց հայ ժողովուրդը՝ ոչ Արեւելահայը, ոչ Արեւմտահայը, ոչ գիւղացին, ոչ հատ ու կենտ բանուորը, ոչ ինտելիգենտը, այլ ամբողջ հայ ժողովուրդ՝ X (իբս) կուսակցութեան մը ղեկավարութեամբ, ուրացուած է եւ մոռացուած:

Ժամանակն է որ առարկայականօրէն վերագնահատենք փաստերը՝ առանց կանխակալ կարծիքի եւ օտարէն ներշնչուած ասելութեան, եւ Հայաստանի Հանրապետութեան տանք իր արժանի տեղը հայոց պատմութեան մէջ:

\* \* \*

1918-ի գարնան վերջերը հոչակուեցաւ Հայաստանի Հանրապետութիւնը: Արտասահմանի տարագիր հայութիւնը ընդհանրապէս ուրախութեամբ, խանդավառութեամբ եւ արցունքոտ աչքերով ողջունեց զայն: Սակայն, գտնուեցաւ հոսանք մը, որ անոր ծննդեան վաղորդայնին իսկ սկսաւ անբարեացականութեան նշաններ ցոյց տալ անոր հանդէա: Այդ օրեն ի վեր անցած են քառասուն եւ իինգ երկար տարիներ, քայլ չարչարեալ, խաչեալ եւ թաղեալ մանուկին հանդէա հակակրութիւնը չէ մեղմացած: Ինչո՞ւ:

Հայաստանի Հանրապետութեան դէմ եղած առարկութիւններէն մէկն այն է, թէ ան չէր ընդգրկեր ամբողջ պատմական Հայաստանը (մանաւանդ առարկողին ծննդավայրը) եւ թէ ան ողբալիօրէն փոքր էր ու մասնակի: Այսօր այդ առարկութիւնն ընողները կը քաւականանան եւ կը պարծենան շատ աւելի փոքր Հայաստանով մը, ինչ որ անհետեւողականութիւն է:

Սակայն, մենք լուրջի պիտի առնենք այս առարկութիւնը եւ պիտի պատասխանենք: Հայաստանի Հանրապետութեան փոքր ծաւալին պատճառն այն ողբերգութիւնն էր, որ Համաշխարհային Առաջին պատերազմի ընթացքին մեր դաւադիր քշնամին բնաջնջած էր հայութիւնը իր պատմական Հայրենիքին մեծագոյն մասին՝ թրքահայկական նահանգներուն մէջ: Մնացած էր միայն Ռուսահայաստանը, որուն մօտ ապատանած էին նաեւ թքական սպանդէն ճողովրած 300.000 արեւմտահայեր: Դատարկութեան մէջ հայրենիք ստեղծել կարելի չէ: Հայկական պետութեան մը միակ հնարաւոր կռուանն ու առաջին հանգրուանը այս փոքրիկ տարածութիւնը կրնար ըլլալ: Այստեղ հայր կրնար ամրանալ, աճիլ ու զօրանալ, եւ օր մըն ալ յորդիլ ու վերագրաւել իրմէ բռնի ուժով խլուած պապենական ստացուածքը: Մինչ այն՝ անհրաժեշտօրէն փոքր պիտի ըլլար Հայաստանը: Նոյնիսկ եթէ կարելիութիւն կար, եւ այն ատեն կը կարծէնք, որ կար, դիւանագիտական ճանապարհով ձեռք բերել Թրքահայաստանի ազատագրութիւնը եւ Ռուսիոյ ու Թուրքիոյ հայկական հողերուն միացումը ամբողջական Հայաստանի մը մէջ, դարձեալ մեր իրաւական պահանջներուն կռուանը արդէն ստեղծուած, իրական Հայաստանը միայն կրնար ըլլալ:

Եթէ իրատես ըլլայինք, այսպէս պիտի մտածէնք, եւ մանուկ Հայաստանը, փոխանակ արհամարհանքի, գուրգուրանք պիտի ստանար մեզմէ: Իսկ եթէ քիչ մըն ալ ծանօթ ըլլայինք հայոց պատմութեան, պիտի յիշէնք անցեալի բոլոր մասնակի Հայաստանները, Արտաշէսինը (Զարեհին մասը գրաւելէ եւ կցելէ առաջ), Բագրատունիներունը, Արծրունիներունը, Կիլիկիայինը: Միթէ՝ կ'անգոսնենք եւ կը մերժենք զանոնք,

որովհետեւ անոնք չին պարփակեր ամբողջ Հայաստանը: Կիլիկեան թագաւորութենէն, օրինակ, դուրս կը մնային եւ Մեծ Հայքը, եւ Փոքրը: Ասիկա պատճառ մը չէ, սակայն, որ ան նիւսներուն չափ հարազատ եւ սիրելի չըլլայ մեզի:

Հայաստանի Հանրապետութեան դէմ ուրիշ առարկութիւն մ'ալ այն է, որ ան «անոնցն» էր: Այս «անոնցը» ունի երկու իմաստ, երկո՛ւն ալ իրականութեան չհամապատասխանող:

Առաջինն այն է, որ արեւելահայերն են որ կերտեցին Հայաստանի Հանրապետութիւնը: Երկրորդն այն է, որ ան Դ. Յ. Դաշնակցութեան ձեռակերտն է: Հայութեան երկու սրբազն լեռներու՝ Արարատի եւ Արագածի միջեւ, Հայաստանի պատմական երկու մայրաքաղաքներուն Արմավիրի եւ Վրտաշատի շուրջը, Հայ Եկեղեցւոյ կեդրոն Եջմիածնի քովն ի վեր ստեղծուեր էր հայկական պետութիւն մը, բայց մարդիկ չին ընդունիր զայն, որովհետեւ զայն ստեղծողները «անոնք» էին:

Տիեզերական պատմական երեւոյք է, ամէն նոր պետութիւն, նոր կրօն, ընկերային շարժում կը հիմնուի մէկ կամ քանի մը անհատի եւ անոնց շուրջ բոլորուած համախոհներու կողմէ: Թող՛ այս խմբաւորումները կոչուին նախարարական տուն, կրօնական եղբայրակցութիւն կամ քաղաքական կուսակցութիւն: Առանց դեկավարութեան հանրային ո՛չ մէկ գործ կը յաջողի: Արշակունիները, Բագրատունիները, Վարդանանք, Ուուրինեանները եւ այն ամբողջ հայ ժողովորդը չին, այլ անոր շատ փոքր մէկ մասը միայն, «ցեղ» մը, Տուն մը, կուսակցութիւն մը, բայց անոնց գործը, անոնց նուածումները ազգային էին: Քաղաքական հաստութիւն ունեցող ազգերը գիտեն ասիկա: Անոնք կիւրացնեն, կազգայնացնեն կուսակցութիւններու տարած յաղթանակները, կը դարձնեն զանոնք հասարակաց սեփականութիւն եւ ժառանգութիւն: Հայրենասէրին համար, քաղաքացի անուան արժանի մարդուն համար, ազգային դրօշն է կարեւորը, ո՛չ դրօշակիրը, ինչպէս գիտակից քրիստոնեային համար խաչն է կարեւորը եւ ո՛չ թէ զայն վեր բռնող եպիսկոպոսը: Հրանանատար եւ դրօշակիր կրնան փոխուիլ ու կը փոխուին: Յաւիտենականը Ազգն ու Հայրենիքն են:

Որքա՞ն հսկայ տարբերութիւն կայ հայուն եւ ուրիշ ազգերու մտայնութեան միջեւ: Նայեցէք համայնավար ռուսերուն. անոնք տապալեցին ցարիզմը, ցարն ալ գնդակահարեցին: Սակայն, երբեք չեն մոռնար ցարական անցեալը, ո՛չ ալ թոյլ կու տան, որ մոռնան ուրիշները, մանաւանդ իրենց նոր սերունդը: Մոսկովեան իշխանները, Ռոմանով մեծ կայսրերը ցարական շրջանի պետական եւ գինուրական հերոսները, ամէնը կը փառաբանուին պատմական-գրական եւ թատրական շարժանկարային գործերու մէջ: Անոնք չեն ըսեր. «Չենք ճանչնար ցարական Ռուսաստանը, որովհետեւ անոնց Ռոմանովներու Ռուսաստանն է»: Մնաց

որ «անոնց» բառին երկու իմաստներն ալ Հայաստանի Հանրապետության պարագային չեն պատշաճիր:

Հայաստանի Հանրապետութիւնը հիմնուեցաւ բովանդակ հայ ժողովուրդին ճիգերով, անոր ստեղծման մէջ դեր կատարեց ոչ միայն արեւելահայութիւնը, այլև արեւմտահայ գաղթականութիւնը եւ աշխարհի չորս ծագերէն երկիր փութացող կանաւորութիւնը: Հայոց ազատութիւնը կերտեցին Դաշնակցական պետքութեան՝ Արամին եւ Դոյլիին հետ միասին ոչ-կուսակցական օրուավարներ՝ Նազարբեկեան, Սիլիկեան եւ Փիրումեան: Ինչո՞ւ համար հայ ժողովուրդի միահամուռ ջանքերով ստեղծուած հանրապետութեան հիմնադրի պատիւը տալ միայն արեւելահայութեան եւ միայն Դաշնակցութեան:

Այո՛, Դաշնակցութիւնն էր շարժման ոգին եւ դեկավարը, ոչ միայն այդ ժամին եւ այդ տեղին վրայ, այլեւ իր 28 տարիներու ընթացքին հայութեան երկու հատուածներուն մէջ եւ ի սփիւռս աշխարհի իր կատարած գաղափարական ու կազմակերպական աշխատանքով, որ կը պտղաւորուէր պատմական այս րոպէին:

Հայաստանի Հանրապետութեան դէմ եղած առարկութիւններուն ամենէն գլխաւորը եւ թունաւորը պետք է նկատել այն, թէ թուրքին «Չնորին» է ան: Հայ մարդիկ անկախ Հայաստանը չճանչցան, չընդունեցին, որովհետեւ ան «քուրքին նուէրն էր»: Կ'ըսէին. «Թուրքը հային բարի չի կամենար, ան հային թշնամի է. արար-աշխարհ գիտէ ասիկա: Ուրեմն թուրքին մեզի շնորհածն ալ՝ Հայաստանի Անկախութիւնը չարիք է»:

Այս թիւրհացութեան, կամ աւելի ծիշդը՝ չարամիտ առասպելին վրայ է, որ կ'ուզենք ծանրանալ:

Նախ՝ տեսնենք թէ ի՞նչ կը նշանակէ «շնորհ»ը: Բառարանը այսպէս կը սահմանէ այդ բառին իմաստը. «Շնորհը պարզէւ մըն է,- որ մէկէն կը տրուի ծրի առանց որ ստացողն իրաւունք կամ արժանիք ունենայ, լոկ բարեացակամութեամբ»: Ուրեմն՝ Հայաստանի Հանրապետութիւնը թուրքին շնորհն էր ըսողները իրօք ըսած կ'ըլլան թէ՝ հայը ծրի ստացաւ իր անկախութիւնը,-բան մը որուն ոչ իրաւունք ունէր, ոչ ալ արժանիք: Այսինքն՝ այսպէս մտածողներ իրենց ատելի թուրքն ալ կը դնեն մեծահոգի ազգի տեղ... ի՞նչ անհեթեր հակասութիւն եւ ողորմելի արժանապատուութիւն:

Մէկդի ձգելով թուրքի բարեացակամութեան եւ հայ ազգային արժանապատուութեան հարցերը եւ զուտ իրատեսութեամբ նայելով խնդրին՝ թուրքը ինչպէս կրնար հայուն այդ շնորհը ընել: Իրաւական կամ փաստական ի՞նչ հիմք ունէր: Որո՞ւն հողը որո՞ւն պիտի տար: Այն հողանասերը, որոնք հետազային կազմեցին Հայաստանի Հանրապետութիւնը, թուրքին չին պատկաներ, այլ՝ ռուսին: Այնտեղ կը գտնուէին հայկական գօրանասեր, կանոնաւոր եւ կամաւոր: Թուրքերը, ռուսական

«Երեւանեան» նահանգը որեւէ մէկուն տալու համար, նախ եւ առաջ պէտք է տիրանային անոր. այդ է որ չկրցան ընել: Զախողեցան եւ զիջեցին: Զիջելու եւ շնորհելու միջեւ տարբերութիւն մը կայ:

Անցեալին, երբ Թուրքիոյ փանթուրանական ծրագիրները անծանօթ էին մեր ժողովուրդի նոյնիսկ ղեկավարներուն, ներելի էր շփոթութեան մէջ իյնալ եւ 1918-ի կովկասեան անցքերը եւ քաղաքական յարաբերութիւնները մնեաբանել կովկասեան ժողովուրդներու բնական ձգտումով ազատագրուելու ռուսական օտար եւ բռնակալ լուծէն, եւ Թուրքիոյ նոյնքան բնական ձգտումով հզօր եւ ծաւալական Ռուսաստանի ու իր միջեւ ստեղծելու պատուար պետութիւն մը, միացեալ անկախ Անդրկովկասը: Այժմ արդէն անարդարանակի է ասիկա: 1918-ին դիտապաստ ինկած էր ռուսական հսկան: Թուրքիան, շնորհիւ իր մեծ դաշնակից Գերմանիայի, յաղթական էր եւ գինով: Ան հասած կը նկատէր ժամը իրագործելու իր եւ Ռուսաստանի թրքական ժողովուրդներուն երկար ատենէ ի վեր փայփայած ծրագիրը՝ գրաւել Կովկասը, մաքրել զայն ոչքուրը տարրերէն, ինաւ հայերէն ու վրացիներէն, եւ կցել զայն Օսմանեան կայսրութեան, առանց այլեւայլի: Ոչ իսկ իրենց ցեղակից եւ կրօնակից ազերիներուն անկախութիւն շնորհելու տրամադրի էին օսմանցիք. այդ մասին լսել անգամ չէին ուզեր: «Թիւրք օղլու թիւրք չէ՞ք դուք,- կը պոռային անոնք ինքնավարութեան բաղձանք յայտնող ազրայժանցիներու երեսին,- ի՞նչ պիտի ընք անջատ իշխանութիւնը»: Դաւատակի բա՞ն է, որ այսպիսի ազատատեաց եւ անթոյլատու մարդիկ հայուն անկախութիւն շնորհել յօժարէին:

Ի՞նչ է այս յիմարական շնորհի վարկածին հիմք: Այն, որ 1) Թուրքիա ճանչցաւ Հայաստանի Հանրապետութիւնը եւ 2) որ՝ ան, դէպքերու բերումով, Հայաստանի Հանրապետութեան անկախութիւնը ճանչցող առաջին օտար կառավարութիւնը եղաւ:

Առաջին կէտը անշուշտ չ'արժէր լրջօրէն առնել: Անկախութիւն ճանչնալ՝ չի նշանակէր անկախութիւն շնորհել: Այսքանը սորված ըլլալու են ամենէն անտեղեակներն ալ, երբ այսօր աշխարհի մէջ ամէն օր նոր պետութիւն մը կը բուսնի եւ հետեւեալ օրն իսկ կը ճանչցուի բոլոր մեծ ու փոքր պետութիւններու կողմէ եւ կ'երթայ բազմելու Միացեալ Ազգաց Կազմակերպութեան մէջ:

Երկրորդ կէտը, որ Թուրքիան եղաւ առաջինը Հայաստանի անկախութիւնը ճանչցող, աւելի կարեւոր է եւ պէտք է ըլլայ հպարտութեան պատճառ՝ հայուն համար: Բարեկամներէն ճանչցուիլը դժուար խնդիր չէ որեւէ ազգի համար. թշնամիէն ընդունուիլը, ճանաչումը թշնամիին պարտադրելը՝ ասո՞ր մէջ է իսկական յաղթանակը:

Եւ այս է ահա, որ ողբալի ու ամօթալի կը գտնեն մեր հասարակութեան անգիտակից տարրերը:

Գիտենք, որ կարգ մը բանգէտներ այստեղ պիտի ըսեն մեզի.-

Թուրքերը կ'ուզէին, որ կովկասեան ժողովուրդները անջատուէին Ուլսաստանէն: Անոնց ճնշումին ներքեւ էր, որ կազմուեցաւ Անդրկովկասեան ժողովուրդներու Դաշնակցային Յանրապետութիւնը, որ հետագային կազմալուծուելով՝ յանգեցաւ Վրաստանի, Ազրաբյանի եւ Յայաստանի անկախութիւններուն:

Այսպէս խօսողները ծանօթ են մէկ-երկու մակերեսային փաստի, բայց ոչ թուրքին իրական շարժառիթներուն եւ թաքուն ծրագիրներուն: Կրկնութեան գնով ըսենք նորէն, որ թուրքերը կովկասեան ժողովուրդներուն առանձին կամ հաւաքական անկախութիւն տալու հեռաւոր իսկ միտք չունեին: Մասնաւորապէս հայերուն վերաբերմանք անոնց ծրագիրն էր Թուրքիոյ մէջ սկսուած «բարի» գործը լրացնել: Արեւելահայութեան եւ անոր մօտ ապաստան գտած արեւմտահայ զանգուածին վերապահուած ճակատագիրն էր՝ ստոյդ նահ: Թուրքերն կանգ առին եւ սկսան խորիիլ այն ատեն միայն, երբ Երեւանի ճամբան իրենց առջեւ փակող հայ զօրանասերը եւ կամաւորական գունդերը կեցուցին զիրենք եւ ըսին՝ պիտի չանցնիք:

Այստեղ դէմ-դէմի եկան անապատի ծնունդ աշխարհակալ եւ աշխարհակուլ ցեղի մը գայլի ախորժակը եւ վաղեմի, քաղաքակիրը եւ քաջարի ցեղի մը կուլ չերթալու վճռականութիւնը: Եւ գազանը ընկրկեցաւ:

Ի՞նչ հեգնանք, որ Յայաստանի Յանրապետութիւնը վարկաբելու համար զայն կոչեն օտարին շնորհը, մինչդեռ պատմական իրողութիւնն այն է, որ ան եղած է թերեւս միակ անկախութիւնը, որ օտարին շնորհը չէ եղած:

Եթե մեր պատմութիւնը կարողանք այնպէս, ինչպէս որ ան արձանագրուած է հայ եւ օտար պատմագիրներու կողմէ, առանց դէպքերու շատ խորը երթալու եւ փաստերու իրական պատճառները որոննելու, կը ստանանք այն որոշ տպաւորութիւնը, որ հայ զանազան արքայական հարստութիւններու հետեւորդներուն եւ շատ մը միջանկեալ իշխաններուն գլուխը թագ դնողը, ուրիշ խօսքով՝ «անկախութիւն շնորհողը» եղած է կամ պարսիկ Արքայից Արքան, կամ Շոռվմի (կամ Բիւզանդիոնի) կայսրը, կամ արար խալիֆան, կամ ալ խաչակիր Շոռվմէական Կայսրութեան վեհապետը: Իսկական բացառութիւն է միայն առասպելական Յայկը:

Հիմա այս բոլորին հետ բաղդատենք Յայաստանի Յանրապետութեան իիննումը: Մանրանասնութիւններու մէջ պիտի չմտնենք, որովհետեւ այդ մեզ շատ հեռուները պիտի տաներ, եւ, ինչպէս ըսինք, մեր նպատակը պատմութիւն գրել չէ: Կ'ուզենք միայն վեր առնել մէկ քանի իիմնական իրողութիւններ:

Օգոստոս 1, 1914-ին սկսաւ Առաջին Յամաշխարհային պատերազմը կեղրոնական պետութիւններու եւ դաշնակից ազգերու միջեւ:

Հայուն համար՝ այս սկիզբն էր երկանց: Թուրքն ալ զայն նկատեց յուսատու արշալոյս իր ազգային նպատակներուն իրազործնան համար, որոնց մաս կը կազմէր Թուրքիոյ թրքացումը, այսինքն՝ անոր մաքրագործումը ոչ-թուրք տարրերէն, նաև աւորապէս հայերէն: Վստահ Գերմանիոյ վերջնական յաղթանակին՝ ան նետուեցաւ կրուի մէջ կեղրոնական պետութիւններու կողքին: Եւ Համաշխարհային Առաջին պատերազմի ընթացքին, մանաւանդ 1915-1916 տարիներուն, Օսմանեան կայսրութեան ներքին գործոց նախարար Թալէաթ փաշայի եւ իշխանութեան գլուխ գտնուող հթթիհատ վէ Թէրաքքի կուսակցութեան անմիջական հրահանգներով ու դեկավարութեամբ արմատախիլ եւ բնացինց եղաւ երկրին գրեթ ամբողջ հայ ազգաբնակչութիւնը, մէկ ու կէս նիլին հոգի, այր, կին, ծեր եւ մանուկ: Սպանդէն ճողոպրոդները փախան եւ ապաստանեցան Կովկաս:

Քիչ յետոյ սակայն, ռուսական բանակները գրաւեցին ամբողջ Թրքահայաստանը: Թրքահայ փախստականներէն մաս մը վերադարձաւ իր տեղը՝ քանդուած բոյնը վերաշինելու:

### **Հայաստանի Համրապետութեան ստեղծումը**

Համաշխարհային Առաջին պատերազմը կը մօտենար դաշնակիցներու համար բարեյաջող վախճանի, երբ Ռուսաստանի մէջ պայթեցաւ մեծ յեղափոխութիւնը: 1917 Ապրիլին (նոր տոնմար), Դուման տապալեց ցարիզմը եւ հաստատեց ժամանակաւոր կառավարութիւն նը: Նոյն տարուայ Նոյեմբերին բոլշեվիկները տապալեցին այդ կառավարութիւնը եւ հաստատեցին Սովետական իշխանութիւն:

Նոր կառավարութիւնը գործի անցաւ կարգ մը նոր նշանաբաններով՝ «հաշտութիւն՝ առանց տուգանքի եւ կցումի», «պարտադիր զինուորութեան բարձում» եւ «հողերու համայնացում»: Շուտով այս բարի լուրերը հասան բոլոր ռազմաճակատները եւ, անոնց կարգին, նաեւ կովկասեան ճակատը: Ռուս զինուորը, եռամեայ կողիներէն յոզնած եւ հողերու բաժանումէն իր բաժինը ստանալու անհամբեր, ձգեց ամէն բան եւ վազեց տուն: Նոյնքան եւ աւելի սպառած, անօթի եւ բարոյալքուած թուրք բանակին առջեւ բացուեցաւ ճամբան, որ համաթրքական գաղափարներով տոգորուած սպայութեան համար կը նշանակէր Թուրան, իսկ մէկմէտճիքներուն համար՝ թալան: Մեկնող ռուս բանակը ձգած էր անսահման գէնք ու ռազմանիւթ, պարէն ու մթերք:

Հայերը, մինակ մնացած, պահ մը փորձեցին իրենց փոքրիկ ուժերով պաշտպանել ռուսեւթուրք լայնատարած ճակատը եւ արգիլել Թրքահայաստանի վերանուածումը թուրքերէն: Շուտով համոզուեցան, սակայն, որ այդ անկարելի էր:

Դեկտեմբեր 2, 1917-ին բոլշևիկները գերմաններուն հաշտութիւն առաջարկեցին: Բանակցութիւնները սկսան Պրէսթ-Լիթովսքի մէջ: Թուրքերու ճնշումով, գերմանացիները ռուսերէն պահանջեցին ոչ միայն պարպել եւ թուրքերուն յանձնել Թրքահայաստանը, այլեւ իբրեւ վերադիր՝ Կովկասէն անոնց տալ երեք գաւառներ՝ Կարս, Արտահան եւ Բաթում:

Վստահ որ այս պահանջները պիտի ընդունուին ռուսերու կողմէն, առանց սպասելու հաշտութեան կնքումին, թուրքերը սկսան առաջ քալել: Առջեւնին բաց էր. իրենց ճամբուն վրայ միակ արգելքը սակաւաթիւ կամաւորները եւ անոնց պաշտպանութեան ապաւինած գաղթականներն էին: Եւ այսպէս, թուրք բանակը, զինուած ռուսերու թողած գենքերով եւ պարենաւորուած անոնց լքած մթերքով, սկսաւ առաջանալ ու վերագրաւել անոնց թափուր ծգած վայրերը՝ նահ ու աւեր սփուելով իր ճամբուն վրայ:

Մարտ 3, 1918-ին, երբ ստորագրուեցաւ Պրէսթ-Լիթովսքի դաշնագիրը, թուրք բանակը արդէն հասած էր Կովկասի դռնները եւ գրաւած Սարհիամիշը: Բանակին հրամանատարը՝ Վեհիպ փաշան, «մուրհակը» ձեռքը, Անդրկովկասեան Սէյմին կը յայտնէր, թէ եկած էր գրաւելու դաշնագրով իրենց տրուած հողամասերը: Սէյմի այն առարկութեան, թէ ինք իրաւասու չէր ռուսական հողեր թուրքերուն յանձնելու, Վեհիպ փաշան կը յայտարարէր, թէ ինք պիտի յառաջանար մինչեւ որ հանդիպէր Անդրկովկասի անունով խօսելու իրաւասու իշխանութեան: Ասոր վրայ Սէյմը ինքզինք կը հոչակէ Անդրկովկասի անկախ հանրապետութիւն (22 Ապրիլ, 1918), եւ կը յայտնէ որ պատրաստ է ընդունելու Պրէսթ-Լիթովսքի պայմանները եւ հաշտութիւն կնքելու թուրքերուն հետ: Սէյմի նախագահ վրացի Զինենկելի հեռագրով հրաման կը դրկէ թուրք ճակատներու հրամանատարներուն, որ առանց կռուի թուրքերուն յանձնեն պահանջուած վայրերը (Ապրիլ 14-ին վրացիները թուրքերուն յանձնած էին Բաթումը):

Ապրիլ 23-ին Կարսի հրամանատարը հրահանգ կը ստանայ թուրքերուն յանձնելու բերոք. հրամանը կը կատարուի Ապրիլ 24-ին: Քաղաքին կարեւոր շենքերը կրակի տալէ յետոյ, քսան հազար հոգի դուրս կու գան Կարսէն: Կը սկսի ահռելի խուճապ եւ փախուստ: Այս անգամ տնաւեր եւ գաղթական կը դառնայ նաեւ արեւելահայր:

Կարսի յանձնումը չգոհացուց թուրքերը: Փետրուարի վերջերէն ի վեր, թուրքերուն եւ կովկասեան ժողովուրդներուն միջեւ Տրապիզոնի մէջ կը կատարուէին հաշտութեան բանակցութիւններ, որոնք Բաթումի գրաւումն յետոյ փոխադրուեր էին Բաթում: Մայիս 11-ին թուրքերը ներկայացուցին նոր եւ աւելի ծանր պայմաններ: Այժմ անոնք կը պահանջէին Պրէսթ-Լիթովսքի դաշնագրով իրենց տրուած Կարս, Արտահան եւ

Բարումեն զատ, որոնց արդէն տիրացեր էին, նաեւ Սուլմալուն, Շարուրը, Նախջեւանը, Երեւանի, Էջմիածնի ու Ալեքսանդրապոլի գաւառներուն մեծ նասը եւ Ալեքսանդրապոլ-Զովլֆա Երկաթուղագիծը: Միւս կողմէն՝ Ազրպէճանի թուրքերը, պաշտօնական պատուիրակութենեն զատ, պատգանաւորութեան մը միջոցով կը պահանջէին Ղարաբաղը, Զանգեզուրը, Ղարալագեազը եւ Բասարգէչարը, Ծոյնիսկ Երեւան քաղաքը, զոր լրբօրէն «զուտ թրական» կը կոչէին՝ հայերուն «վեհանձօրէն» թողնելով Էջմիածինը իբրեւ «մայրաքաղաք»: Յայութիւնը հոն կրնար հոգեհանգիստ կատարել իր արեւմտեան եւ արեւելեան հատուածներուն վրայ: Եւ մինչ Երկու կողմերը Բարում մէջ կը բանակցէին, թուրքերը, խախտելով զինադադարը, անցան առաջ, գրաւեցին Ալեքսանդրապոլը (Մայս 15) եւ սկսան քալել Երեւանի վրայ:

Մինչեւ այդ ատեն հայերը բռնած էին վրացիներու ու ազերիներու հետ համագործակցութեան ճամբան: Յարեւան ժողովուրդներուն հետ միաբանութեան, բնականաբար, աւագ կարեւորութիւն կ'ընծայէին հայերը, չէին ուզեր մինակ մնալ թշնամին դէմ: Սակայն, անողոք եւ տխուր իրականութիւնն այն էր, որ Անդրկովկասի Յանրապետութեան բաղադրիչ երեք ազգութիւնները ունեին տարբեր, հակամարտ ձգտումներ: Ազրպէճանցիները տենչալով կը տենչային թուրքերու եւ համաթրութեան յաղթանակը: Անէն բան կ'ընէին, ապստանբութիւն, ջարդ, սապօթած՝ բանալու համար Բաքուի ճամբան թուրք բանակի առջեւ: Յայերը կը յուսային եւ հաւատքով կը սպասէին Դաշնակիցներու յաղթանակին, եւ, մինչ այդ, իրենց կարելին կ'ընէին կրուով եւ դիւնազիտութեանք թուրքը հեռու պահելու Կովկասէն: ճարպիկ Վրացիներն ալ կը վարէին ինքնորոյն քաղաքականութիւն: կը ձգտէին եւ յաջողած էին ձեռք բերել Գերմանիոյ հովանաւորութիւնն ու զինուրական օգնութիւնը անկախ Վրաստանի համար:

Դաշնակիցները, աւան՝, հեռու էին Յայաստանէն, որքան Երկնքի աստղերը: Ուուսաստանն ալ, քաղաքացիական կրիտով գրադած, ոչ նուազ հեռու էր հայերէն: Գերմանացի ներկայացուցիչ օօր. Լոսով, թուրքերուն չափաւորութեան ապարդիւն յորդորներ կարուալէ յետոյ, յուսահատ մեկներ էր Պերլին: Չնեկնած՝ իր կառավարութեան ղրկած տեղեկագիրներուն մէջ ան կը գրէր. «Թուրքերը դիտմանք անընդունելի պայմաններ կ'առաջարկեն հայերուն, որովհետեւ իրենց նպատակն է բնացինց ընեւ զանոնք»: Պարտուած պատերազմի մէջ, դաւաճանուած իր հարեւաններէն, ուժասպառ, տկլոր եւ անօթի հայերը մէն-մինակ կեցած էին իրենց երդուեալ եւ անողորն ոսդիմին դիմաց:

Թուրք բանակը, տիրանալով Կարսին, եւ նենգութեանք գրաւելով Ալեքսանդրապոլը, սկսաւ երեք զօրասիւներով առաջանալ Երեւանի վրայ: Զախ զօրասիւնը Երկաթուղիի գծով կը շարժուէր Ղարաքիլիսէի վրայով:

Ազ օրասիւնը՝ դարձեալ Երկաթուղագիծով կառաջանար Սարդարապատի վրայով, իսկ կեդրոնական օրասիւնը՝ խճուղիով Ապարանի վրայով:

Եւ, յանկարծ, տեղի ունեցաւ մէկը այն բաներէն, զոր մարդը իր տգիտութեան եւ լեզուի աղքատութեան պատճառով «հրաշք» կը կոչէ: Ծունկի բերուած հայը վեր բարձրացաւ, շտկեց իր մէջքը, ցնցեց իր բաշը եւ ըսաւ. «Պիտի չմեռնի՞ն»: Ու վեր կեցաւ եւ կռուեցաւ առնուազն կրկնապատիկ թուով թշնամիին ուն ու խորտակեց թուրք յառաջացող բանակին բափը երկու անմոռաց դիւցազնամարտերով, որոնք կը կոչւին Սարդարապատ-Բաշ-Ապարան եւ Ղարաքիլիսէի ճակատամարտեր:

Երեւուրապէս վճռական յաղթանակներ չէին Սարդարապատն ու Ղարաքիլիսէն: Այս ճակատամարտերը տեղի չունեցած թուրքերը արդէն առաջարկած էին ճանչնալ Յայաստանի Յանրապետութիւնը, Սեւանի շուրջ 11 հազար քառակուսի քիլոմետր տարածութեամբ, եւ մեր յաղթանակները թիզ մը հող չաւելցուին այս տարածութեան վրայ: Ի մտի պետք է ունենալ, սակայն, որ առաջարկուած հաշտութեան դաշինքը խարեւիւն մըն էր միայն հայերը գինաթափելու, հայկական հողերուն մնացեալ մասը գրաւելու եւ բնակչութիւնը պատեհ առիթով բնաջնջման ենթարկելու համար: Մինչդեռ Ցունիս 4-ին Բարումի մէջ դաշինքի ստորագրութիւնը իրական ճանաչում էր, արդիւնք թուրքերու հանողումին, որ կարելի չէր այլևս հայերը խարել կամ վախցնել եւ որ անոնք պիտի կռուէին ծանր կորուստներ պատճառելով իրենց:

Մեզի տրուած բան չկար: Ի՞նչ որ մեր հարեւաններուն հետ համերաշխութեան սիրոյն գիշեր էինք 1914-ի սահմանէն՝ կորած էր: Ի՞նչ որ կրիտվ պահած էինք՝ կը մնար մեզի: Մեր գոյութիւնն ու ազատութիւնը միմիայն մեր վճռականութեամբ ու մեր սեփական ուժովը խլած էինք թուրքէն:

Քանի մը ամիս յետոյ, կը հասնէր Ղաշնակիցներու յաղթանակը: Մուտքոսի դաշնագրի (30 Յոկտ. 1918) յատուկ տրամադրութեամբ, Թուրքիա կը ստիպուէր վերականգնել 1914-ի թուրքեւուս սահմանը եւ դուրս գալ Կովկասէն: Յայաստանի Յանրապետութեան տարածութիւնը կը քառապատկուէր: Յայաստան կը դաշնար գաղթականները տեղաւորելու եւ ապրելու ու ուռճանալու կարող երկիր մը: Նոյնիսկ Ալեքսանդրապոլի դաշնագրով կատարուած կտրատումէն յետոյ, անոր տարածութիւնը Բարումի դաշնագրով ճանչուածին մօտ եռապատիկն էր:

Ըսինք թէ յանկարծ հրաշք պատահեցաւ: Պատմական դէպքերը հրաբուխներու պէս ունին իրենց ընդերկրեայ թաքուն ազդակները. հանդիսատեսը միայն անոնց պոռքկումը կը տեսնէ:

1917 Յոկտեմբերին, Յայոց Ազգային Խորհուրդը, տեսնելով որ վրացի-ազերի պլոքի թրքաւէր քաղաքականութիւնը կը վտանգէր հայ ժողովուրդին շահերը եւ նոյնիսկ ֆիզիքական գոյութիւնը, որոշեց միջոց-

ներ ձեռք առնել: Ան Երեւան ուղարկեց անուանի գործիչ Արամը իբրև լիազօր ներկայացուցիչ: Շնորհիւ իր երկարէ կամքին, անբաւ կորովին եւ արտակարգ բաքրին, Արամ յաջողեցաւ իր շուրջը համախմբել Երեւանի մտաւորականութիւնը, կուսակցութիւնները եւ բոլոր գործօն ուժերը: Յաջողեցաւ մանաւանդ իրեն գրաւել զինուորականութիւնը եւ կարճ ժամանակի մէջ կազմակերպել զինուորական պատկառելի ոյժ: Մարտ 18, 1918-ին, ժողովուրոյի միահամուր պահանջով, ան հոչակուեցաւ տիքքարոր, եւ իր ձեռքին մէջ ամփոփեց ամբողջ իշխանութիւնը: Արամի կողքին եւ անոր հետ համախորհուրդ կը գործէր աննան Դրօն: Եթէ Արամը հայ ժողովուրոյի կամքն էր, անոր բազուկն էր Դրօն:

Արիւնարքու թշնամին հետ հայոց երկու ընդհարումները եղան զարհուրելի: Յայկական կռուող ուժերուն թիւն էր հազիւ 17 հազար, անբաւարար կերպով զինուած եւ պարենաւորուած, բուրքերու 35 հազարէ աւելի կանոնաւոր զօրքին դէն: Սարդարապատի մէջ զօր. Սիլիկեանի հրամանատարութեան տակ գտնուող 10 հազարնոց բանակը, որու աջ թէւին՝ Բաշ-Ապարանին կը հրամայէր Դրօն, իսկ ձախ թէւին՝ զօր. Փիրումեանը, երեքրոյեայ ահեղ ճակատամարտով ջախջախտեց իրնէ երկու անգամ մեծ թրքական բանակը եւ տարաւ անվիճելի յաղթանակ: Իսկ Ղարաքիլսէի մէջ, սպարապետ Նազարեգեանի կոչով մէկ օրուայ մէջ համախմբուած 7 հազար նարտիկներու աննոռանալի մահուան բանակը չորս օր (Մայս 23, 24, 25, 26) կատաղօրէն կռուեցաւ օսմանեան 15 հազարնոց բանակին դէն, մինչեւ որ երկու կողմներն ալ պարտութեան մատնուեցան: Չորս հազար հայ քաջեր ինկան՝ իրենց հետ «դէպի մահու աղքայութիւն» տանելով կրկնակի թուով թշնամի:

Այս ճակատամարտերը հայ ժողովուրոյի պատմութեան արձանագրած ամենէն սխրալիներն են թէ՝ իրենց կատաղութեամբ, թէ՝ զոհերու թիւով եւ թէ բախսորոյշ արդիւնքով:

\* \* \*

Յինա ակնարկ մը նետեցէր այս դիւցազնամարտերուն մասնակցող նարտիկներուն վրայ: Այնտեղ են երգորումի գունդը, Վաճայ երեք գունդերը, Ձեյթունի ձիաւոր գունդը, Երգնկայինը, Մակուհնները եւ այլն եւն: Այլ խօսքով՝ հո՞ն են Բարձր Յայքը եւ Եկեղեացը, Վասպուրականն ու Տուրութերանը, Յերն ու Զարեւանդը, եւ հեռաւոր Կիլիկիան՝ Արարատի, Սիւնիքի, Լոռիի, Շիրակի, Վանանդի եւ Կոտայքի կողքին: Յո՞ն են ռուսահայը, թրքահայը, պարսկահայը եւ հեռաւոր գաղութներէն թռած, Եկած կամաւորմերը: Սասունցի Սմբատը եւ ղարաբաղցի Դալի Ղազարը կանգնած են կողք-կողքի: Բառ մը հայերէն չհասկցող ռուսախօս զինուորականներուն քովը բառ մը հայերէն չհասկցող թրքախօս

գինուորներ ու կամաւորներ: Կը կրուին այն յստակ գիտակցութեամբ, որ ամէնը հայ են, եւ թերեւս հայութեան վերջին կրիւն է:

Երբեւիցէ տեսա՞ծ էք այսպիսի տիեզերական, համահայկական բանակ: Այս մարդիկը անոնք չեն, այլ՝ մենք, մեր լաւագոյնը, ընտրելագոյնը, որ «մահուամբ զմահ կոխեաց»:

1500 տարի առաջ հայրենասէր ողբերգակ տեսանողին խօսքերը որքա՞ն կը պատշաճին այս նահատակներուն. «Գեղեցիկ էին դիակունք անկելոյ ի սրոյ»:

Ժամանակն է, որ մեր գլխարկները հանենք անոնց կատարած արիութեան մեծ գործին առջեւ, եւ իրենց ձեռակերտին՝ Հայաստանի Հանրապետութեան տանք այն պատույ տեղը, որ իրաւամբ անոր կը պատկանի հայ ազգի պատմութեան մէջ:

Հայուն այսքա՞ն կատաղի եւ անտեղիտալի դիմադրութիւնը անակնկալ էր թուրքին համար: Սարդարապատի եւ Ղարաքիլիսէի ճակատամարտերն քանի մը օր յետոյ, Յունիսի 4-ին, Բաքումի մէջ կը ստորագրուէր հաշտութեան դաշնագիրը Օսմանեան կայսրութեան եւ Հայաստանի նորածին հանրապետութեան միջեւ:

\* \* \*

Ասկէ յետոյ Հայաստանի Հանրապետութիւնը ստորագրեց երեք ուրիշ դաշնագիրներ - Սեւրի դաշնագիրը, յաղքական դաշնակիցներու կողքին, պարտուած Թուրքիոյ հետ, 1920 Օգոստոս 10-ին, նոյն տարուայ Դեկտեմբեր 2-ին ալ Ալեքսանդրապոլի դաշնագիրը Թուրքիոյ հանրապետութեան հետ, եւ Երեւանի համաձայնագիրը Ռուսաստանի Խորհրդային կառավարութեան հետ:

Մենք պիտի չանդրադառնանք այս դաշնագիրներու բովանդակութեան: Մեզի համար կարեւոր անոնց միջազգային-քաղաքական նշանակութիւնն է: Ասոնք վաւերագիրներ են, որոնք կը հաստատեն, թէ Հայաստանը ուրոյն, անկախ, վեհապետական իրաւունքներով օժտուած պետութիւն էր, որ կրնար դիւնագիտական գործառնութիւններ ունենալ ուրիշ վեհապետ ազգերու հետ, անոնց համահաւասար իրաւունքներով: Ան ազգային անկախ պետութիւն էր, եթի ռուսական սուլիններու սպառնալիքին տակ իշխանութիւնը յանձնեց Ռուսաստանի Խորհրդային կառավարութեան:

Ատեն մը Խորհրդային Հայաստան Անդրկովկասի Սոցիալիստական Ֆետերաթի Խորհրդային Հանրապետութեան մաս կազմեց, իսկ 1936-ին մտաւ Սովետական Միութեան մէջ իրու «Հայաստանի Սոցիալիստական Խորհրդային Հանրապետութիւն»:

Եթէ ստեղծուած չլինէր «Հայաստանի Հանրապետութիւնը», չէր

ըլլար նաեւ «Հայաստանի Ս. Խ. Հանրապետութիւնը», որու ճակատին ռուսական բռնապետութիւնը կպցուցած է «սոցիալիստական» եւ «սովետական» պիտակները:

Կործանեցան գաղթային միւս բռնապետութիւնները: Ռուսական գաղթապետական կայսրութիւնն ալ, ամենէն բռնապետականն ու կեղեքիչը, պիտի երթայ անոնց ծամբով, հակառակ ռուսերու յամառ նիյեթներուն: Այս է պատմութեան անողոք վճիռը:

Օր նը, երբ Սովետական Միութիւն կոչուած ռուսական գաղթատիրական կայսրութիւնը փլուզումով կամ բարեշրջութեամբ լուծարքի ենթարկուի, Հայաստան դուրս պիտի գայ անկէ ո՛չ թէ իբրեւ Կովկասի նախկին Երեւանեան նահանգ, այլ որպէս «Հայաստանի Հանրապետութիւն»:

Պիտի գայ այդ օրը:

Զարեւանդ<sup>\*</sup>  
(«Հայրենիք» ամսագիր,  
Բուստոն, 1963թ., թիվ 7)

\* Զավեն Նալբանդյան (1890-1973)